

病源候論

巢氏諸病源候總論卷四十一

婦人妊娠病諸候

上

凡二十論

妊娠候

經云陰搏陽別謂之有子此是氣血和調陽施陰化也  
診其手少陰脈動甚者任子也少陰心脈也心主血脈  
又腎名胞門子戶尺中腎脈也尺中之脈按之不絕者  
妊娠脈也三部沈浮正等按之無斷絕者有娠也又左  
手沈實爲男右手浮大爲女左右俱沈實生二男左右  
俱浮大生二女又尺脈左偏大爲男右偏大爲女左右  
俱大產二子又左右手尺脈俱浮爲產二男不爾女作  
男生俱沈爲產二女不爾男作女生又左手尺中脈浮

大者男右手尺脈沈細者女又得太陰脈爲男得太陽脈爲女太陰脈沈太陽脈浮欲知男女遣面南行還復呼之左迴首是男右迴首是女又看上圍時夫從後急呼之左迴首是男右迴首是女婦人妊娠其夫左邊乳房有核是男右邊乳房有核是女任娠一月名曰始形飲食精熟酸美受御宜食大麥無食腥辛之物是謂才貞足厥陰養之足厥陰者肝之脈也肝主血一月之時血流澁始不出故足厥陰養之足厥陰穴在足大指歧閒白肉際是 任娠二月名曰始膏無食腥辛之物居必靜處男子勿勞百節皆痛是謂始藏也足少陽養之足少陽者膽之脈也主於精二月之時兒精成於胞裏

故足少陽養之足少陽穴在足小指間本節後附骨上  
一寸陷中者是 任娠三月始胎當此之時血不流形  
像始化未有定儀見物而變欲令見貴盛公王好人端  
正莊嚴不欲令見偃僂侏儒醜惡形人及猿猴之類無  
食薑兔無懷刀繩欲得男者操弓矢射雄鷄乘肥馬於  
田野觀虎豹及走犬其欲得女者則著簪珂環珮弄珠  
璣欲令子美好端正者數視白璧美玉看孔雀食鯉魚  
欲令兒多智有力則噉牛心食大麥欲令子賢良盛德  
則端心正坐清虛和一坐無邪席立無偏倚行無邪徑  
目無邪視耳無邪聽口無邪言心無邪念無妄喜怒無  
得思慮食無到鬻無邪臥無橫足思欲果瓜噉味酸菹

好芬芳惡見穢臭是謂外象而變者也手心主養之手  
心主者脈中精神內屬於心能混神故手心主養之手  
心主穴在掌後橫文是診其任娠脈滑疾重以手按之  
散者胎已三月也 任娠四月之時始受水精以成血  
脈其食宜稻稊其羹宜魚雁是謂盛榮以通耳目而行  
經絡洗浴遠避寒暑是手少陽養之手少陽者三焦之  
脈也內屬於府四月之時兒六府順成故手少陽養之  
手少陽穴在手小指閒本節後二寸是也診其任娠四  
月欲知男女左脈疾爲男右脈疾爲女左右俱疾爲生  
二子當此之時慎勿瀉之必致產後之殃何謂也是手  
少陽三焦之脈內屬於三焦靜形體和心志節飲食

任娠五月始受火精以成其氣臥必晏起洗浣衣服深  
其屋室厚其衣裳朝吸天光以避寒殃其食宜稻麥其  
羹宜牛羊和以茱萸調以五味是謂養氣以定五臟者  
也一本云宜食魚鱉足太陰養之足太陰脾之脈主四  
季五月之時兒四支皆成故足太陰養之足太陰穴在  
足內踝上三寸也診其任娠脈重手按之不散但疾不  
滑者五月也又其脈數者必向壞脈緊者必胞阻脈遲  
者必腹滿喘脈浮者必水壞爲腫任娠六月始受金  
精以成其筋身欲微勞無得靜處出遊於野數觀走犬  
及視走馬宜食鷲鳥猛獸之肉是謂變腠膂筋以養其  
爪以牢其背膂足陽明養之足陽明者胃之脈主其口

目六月之時兒口目皆成故足陽明養之足陽明穴在太衝上二寸是也 任娠七月始受木精以成骨勞躬搖支無使定止動作屈伸居處必燥飲食避寒常宜食稻稊以密腠理是謂養骨牢齒者也手太陰養之手太陰者肺脈主皮毛七月之時兒皮毛已成故手太陰養之手太陰穴在手大指本節後白肉際中是診其任娠七月脈實大牢強者生沈細者死懷軀七月而不可知時時衄而轉筋者此爲軀衄時噫而動者非軀也懷軀七月暴下斗餘水其胎必倚而墮此非時孤漿預下故也 任娠八月始受土精以成膚革和心靜息無使氣極是謂密腠理而光澤顏色手陽明養之手陽明者

大腸脈大腸主九竅八月之時兒九竅皆成故手陽明  
養之手陽明穴在大指本節後宛宛中是診其任娠八  
月脈實大牢強弦緊者生沉細者死任娠九月始受  
石精以成皮毛六府百節莫不畢備飲醴食甘緩帶自  
持而待之是謂養毛髮多才力足少陰養之足少陰者  
腎之脈腎主續縷九月之時兒脈續縷皆成故足少陰  
養之足少陰穴在足內踝後微近下前動脈是也任  
娠十月五臟俱備六府齊通納天地氣於丹田故使關  
節人神咸備然可預修滑胎方法也

任娠惡阻候

惡阻病者心中憤悶頭眩四肢煩疼懈惰不欲執作惡



聞食氣欲噉鹹酸果實多睡少起世云惡食又云惡字是也乃至三四月日以上大劇者不能自勝舉也此由婦人元本虛羸血氣不足腎氣又弱兼當風飲冷太過心下有痰水挾之而有娠也經血既閉水漬於藏藏氣不宣通故心煩憤悶氣逆而嘔吐也血脈不通經絡否澁則四支沈重挾風則頭目眩故欲有胎而病惡阻所謂欲有胎者其人月水尙來而顏色皮膚如常但苦沈重憤悶不欲食飲又不知其患所在脈理順時平和卽是欲有胎也如此經二月日後便覺不通則結胎也

任娠轉女爲男候

陰陽和調二氣相感陽施陰化是以有娠而三陰所會

則多生女但任娠二月名曰始藏精氣成於胞裏至於三月名曰始胎血脈不流象形而變未有定儀見物而化是時男女未分故未滿三月者可服藥方術轉之令生男也

### 任娠養胎候

任娠之人有宿挾痼疹因而有娠或有娠之時節適乖理致生疾病並令腑臟衰損氣力虛羸令胎不長故須服藥去其疾病益其氣血以扶養胎也

### 任娠禁忌候

任娠男女未分之時未有定儀見物而化故須端正莊嚴清靜和平無傾視無邪聽兒在胎日月未滿陰陽未

備腑臟骨節皆未成足故自初訖于將產飲食居處皆有禁忌

任娠胎閒水氣子滿體腫候

胎閒水氣子滿體腫者此由脾胃虛弱腑臟之間有停水而挾以任娠故也任娠之人經血壅閉以養於胎若挾有水氣則水血相搏水漬於胎兼傷腑臟脾胃主身之肌肉故氣虛弱肌肉則虛水氣流溢於肌故令體腫水漬於胞則令胎壞然任娠臨將產之月而脚微腫者其產易所以爾者胞藏水血俱多故令易產而水乘於外故微腫但須將產之月耳若初任而腫者是水氣過多兒未成具故壞胎也壞胎脈浮者必腹滿而喘壞娠

爲水腫

任娠漏胞候

中經

漏胞者謂任娠數月而經水時下此由衝脈任脈虛不能約制太陽少陰之經血故也衝任之脈爲經脈之海皆起於胞內手太陽小腸脈也手少陰心脈也是二經爲表裏上爲乳汁下爲月水有娠之人經水所以斷者壅之以養胎而蓄之爲乳汁衝任氣虛則胞內泄漏不能制其經血故月水時下亦名胞阻漏血盡則人斃也

任娠胎動候

胎動不安者多因勞役氣力或觸冒冷熱或飲食不適或居處失宜輕者止轉動不安重者便致傷墮若其母

有疾以動胎治母則胎安若其胎有不牢固致動以病  
母者治胎則母瘥若傷動甚者候其母面赤舌青者兒  
死母活母唇口青口兩邊沫出者母子俱死母面青舌  
赤口中沫出母死子活

任娠僵仆胎上搶心下血候

此謂行動倒仆或從高墮下傷損胞絡致血下動胎而  
血傷氣逆者胎隨氣上搶心其死生之候其母舌青者  
兒死母活唇口無沫兒生唇青沫出者母子俱死唇口  
青舌赤者母死兒活若下血不住胞燥胎枯則令胎死

任娠胎死腹中候

此或因驚動倒仆或染溫疫傷寒邪毒入於胞臟致令

胎死其候當胎處冷爲胎已死也

任娠腹痛候

腹痛皆由風邪入於腑臟與血氣相擊搏所爲任娠之人或宿挾冷疹或新觸風邪疔結而痛其腹痛不已邪正相干血氣相亂致傷損胞絡則令動胎也

任娠心痛候

夫心痛多是風邪痰飲乘心之經絡邪氣搏於正氣交結而痛也若傷心正經而痛者爲真心痛心爲神統領諸藏不可受邪邪若傷之朝發夕死夕發朝死若傷心支別絡而痛者則乍閒乍盛休作有時任娠之人感其病者痛不已氣乘胞絡傷損子臟則令動胎凡胎動則

胎轉移不安不安而動於血者則血下也

任娠心腹痛候

任娠心腹痛者或由腹內宿有冷疹或新觸風寒皆因藏虛而致發動邪正相擊而并於氣隨氣下上衝於心則心痛下攻於腹則腹痛故令心腹痛也任娠而病之者正邪二氣交擊於內若不時瘥者其痛衝擊胞絡必致動胎甚則傷墮

任娠腰痛候

腎主腰脚因勞損傷動其經虛則風冷乘之故腰痛婦人腎以繫胞任娠而腰痛甚者多墮胎也

任娠腰腹痛候

腎主腰脚其經虛風冷客之則腰痛冷氣乘虛入腹則  
腹痛故令腰腹相引而痛不止多動胎腰痛甚者則胎  
墮也不墮者任娠小腹痛候是春于任娠小腹痛者由胞絡宿有冷而任娠血不通冷血相  
搏故痛也痛甚亦令動胎也

任娠卒下血候

此謂卒有損動或冷熱不調和致傷於胎故卒痛下血  
不止者墮胎也

任娠吐血候

吐血皆由腑臟傷所爲憂思驚怒皆傷臟腑氣逆故吐



血吐血而心悶胃滿未欲止心悶甚者死任娠病之多墮胎也

任娠尿血候

尿血由勞傷經絡而有熱熱乘於血血得熱流溢滲入於胞故尿血也

任娠數墮胎候

陽施陰化故得有胎榮衛和調則經養周足故胎得安而能成長若血氣虛損者子臟爲風冷所居則血氣不足故不能養胎所以致胎數墮候其任娠而恆腰痛者喜墮胎也

周氏校刊

巢氏諸病源候總論卷四十二

婦人任娠病諸候

下

凡四十一論

任娠傷寒候

冬時嚴寒人體虛而爲寒所傷卽成病爲傷寒也輕者  
嗇嗇惡寒噦噦發熱微欬鼻塞數日乃止重者頭痛體  
疼增寒壯熱久不歇亦傷胎也

任娠傷寒後復候

冬時嚴寒人體虛觸冒之得病名傷寒其狀頭痛體疼  
壯熱瘥後體虛尙未平復或起早或飲食過度病更如  
初故謂之復也

任娠時氣候

四時之間忽有非節之氣如春時應暖而反寒夏時應熱而反冷秋時應涼而反熱冬時應寒而反溫非其節而有其氣一氣之至無人不傷長少雖殊病皆相似者多挾於毒言此時普行此氣故云時氣也任娠遇之重者傷胎也

任娠溫病候

冬時嚴寒人有觸冒之寒氣伏藏肌骨未即病至春而發謂之溫也亦壯熱大體與傷寒相似又冬時應寒而反溫溫氣傷人即病亦令壯熱謂之溫病任娠遇此病熱搏於胎皆損胎也

任娠熱病候

卷四十二

八四十一節

冬時嚴寒觸冒傷之藏於肌骨夏至乃發壯熱又爲暑病暑病卽熱病也此寒氣蘊積發卽有毒任娠遇之多致墮胎也

任娠寒熱候

任娠寒熱病者猶是時氣之病也此病起於血氣虛損風邪乘之致陰陽并隔陽勝則熱陰勝則寒陰陽相乘二氣交爭故寒熱其任娠而感此病者熱甚則傷胎也

任娠寒瘧候

夫瘧者由夏傷於暑客於皮膚至秋因勞動血氣腠理虛而風邪乘之動前暑熱正邪相擊陰陽交爭陽盛則熱陰勝則寒陰陽更虛更盛故發寒熱陰陽相離寒熱

俱歇若邪動氣至交爭則復發故瘧休作有時其發時  
節漸晏者此由風邪客於風府循膂而下衛氣一日一  
夜常大會於風府其明日日下一節故其作發日晏其  
發日早者衛氣之行風府日下一節二十一日下至尾  
骶二十二日入脊內上注於伏衝之脈其行九日出於  
缺盆之內其氣既上故其病發更早其間日發者由風  
邪內薄五藏橫連募原其道遠其氣深其行遲不能日  
作故間日蓄積乃發任娠而發者寒熱之氣迫傷於胎  
多致損動也

任娠下利候

春傷於風邪氣留連遇腸胃虛弱風邪因而傷之腸虛

則洩故爲下利然此水穀利也

任娠滯利候

冷熱不調腸虛者冷熱之氣客於其間熱氣乘之則赤  
冷氣乘之則白冷熱相交連滯故赤白如魚腦鼻涕相  
雜爲滯利也

任娠胃脇支滿候

任娠經血不通上爲乳汁兼以養胎若宿有停飲者則  
血飲相搏又因冷熱不調動於血飲血飲乘氣逆上搶  
於胃脇脹滿脹滿而氣小喘謂之支滿

任娠痰候

水飲停積結聚爲痰人皆有之少者不能爲害若多則

成病妨害飲食乃至嘔吐任娠病之若嘔吐甚者傷胎也

任娠子煩候

臟虛而熱氣乘於心則令心煩停痰積飲在於心胃其冷衝心者亦令煩也若虛熱而煩者但煩熱而已若有痰熱而煩者則嘔吐涎沫任娠之人既血飲停積或虛熱相搏故亦煩以其任娠而煩故謂之子煩也

任娠霍亂候

陰陽清濁相干謂之氣亂氣亂於腸胃之間爲霍亂也但飲食過度冒觸風冷使陰陽不和致清濁相干腸胃虛者受之故霍亂也先心痛則先吐先腹痛則先利心

腹俱痛吐利並發有頭痛體疼發熱而吐利者亦爲霍亂所以然者挾風而有實故也風折血氣皮膚閉密血氣不得宣故令壯熱風邪乘其經脈氣上衝於頭則頭痛風氣入於腸胃腸虛則洩利胃逆則嘔吐故吐利也吐利甚則煩府藏虛故也又手足逆陰陽氣暴竭謂之四逆也任娠而病之吐利甚者則傷損胎也

任娠中惡候

人有忽然心腹刺痛悶亂欲死謂之中惡言惡邪之氣中傷於人也所以然者人之血氣自養而精神爲主若血氣不和則精神衰弱故厲毒鬼氣得中之任娠病之亦致損胎也



任娠腹滿候

任娠腹滿者由腹內宿有寒冷停飲挾以任娠重因觸冷則冷飲發動邪氣相干故令腹滿也

任娠欬嗽候

肺感於微寒寒傷於肺則成欬嗽所以然者肺主氣候皮毛寒之傷人先客皮毛故肺受之又五藏六府俱受氣於肺以四時更王五藏六府亦皆有欬嗽各以其時感於寒而為欬嗽也秋則肺受之冬則腎受之春則肝受之夏則心受之其諸藏欬嗽不已各傳於府任娠而病之者久不已傷於胎也

任娠胃痺候

百脈皆盛於胃而胃氣不和則胃氣不和

胃痺者由寒氣客於藏府上衝胸心悞悞如滿噎塞習習而痺痛胃中慄慄然飲食不下謂之胃痺也而脾胃漸弱乃至斃人任娠而病之非直任婦爲患亦傷損於胎也

任娠咽喉身體著毒腫候

毒腫者是風邪厲毒之氣客入肌肉搏於血氣積聚所成然邪毒傷人無有定處隨經絡虛處而留止之故或著身體或著咽喉但毒之所停血則否澀血氣與邪相搏故成腫也其毒發於身體猶爲小緩若著咽喉最急便腫塞痺痛乃至水漿不通毒入攻心心煩悶任娠者尤宜急救不爾子母俱傷也

任娠中蠱毒候

蠱毒者人有以蛇蠆蜋蝮諸蟲合著一處令其自相殘食餘一箇在者名之爲蠱諸山縣人多作而敬事之因飲食裹以毒斃人又或吐血利血是食人腑臟則死又云有緩急緩者延引日月急者止在旦夕以法術知其主呼之蠱去乃瘥平人遇之尙死況任娠者故子母俱傷也

任娠飛尸入腹候

飛尸者是五尸中一尸也其遊走皮膚貫穿臟腑每發刺痛變作無常爲飛尸也任娠病之者亦損胎也

任娠患子淋候

淋者腎虛膀胱熱也腎虛不能制水則小便數也膀胱熱則水行澀澀而且數淋瀝不宣任娠之人胞繫於腎腎患虛熱成淋故謂子淋也

任娠大小便不通候

人有府藏氣實而生於熱者隨停積之處成病若熱結大腸大便不通熱結小腸小便不通若大小腸俱爲熱所結故煩滿大小便不通也凡大小便不通則內熱腸胃氣逆令變乾嘔也

任娠大便秘不通候

三焦五藏不調和冷熱否結津液竭燥腸胃否澀蘊積結於腸間則大便不通令腹否滿煩熱甚者變乾嘔所

以然者胃內熱氣逆也

任娠大小便不利候

冷熱之氣不調乘於大小腸則謂之爲遊氣壅否而生  
熱或熱病熱入大小腸並令大小便不利也凡大小便  
不利則心脇滿食不下而煩躁不安也

任娠小便利候

小便利者腎虛胞冷不能溫制於小便故小便利也

任娠小便數候

腎與膀胱合俱主水腎氣通於陰腎虛而生熱則小便  
澀虛則小便數虛熱相搏雖數起而不宣快也

任娠小便不利候

腎與膀胱合俱主水水行入胞爲小便臟腑有熱熱入於胞故令小便不利也

任娠小便不通候

小腸有熱熱入於胞內熱結甚者故小便不通則心脇小腸俱滿氣喘急也

任娠驚胎候

驚胎者見懷任月將滿或將產其胎神識已具有勞傷損動而胎在內驚動也

任娠中風候

四時八方之氣爲風常以冬至之日候之風從其鄉來者長養萬物若不從鄉來者爲虛風賊於人人體虛者

則中之五藏六府俞皆在背藏府虛風邪皆從其俞入  
人中之隨府藏所感而發也心中風但偃臥不得傾側  
汗出唇赤汗流者可治急灸心俞百壯若唇或青或白  
或黃或黑此是心壞爲水面目亭亭時悚動者皆不可  
治五六月而死若肝中風但踞坐不得低頭若繞兩目  
連額色微有青唇青面黃可治急灸肝俞百壯若大青  
黑面一黃一白者是肝已傷不可治數日而死若脾中  
風踞而腹滿身通黃吐鹹汁出者可治急灸脾俞百壯  
若手足青者不可治若腎中風踞而腰痛視脇左右未  
有黃如餅飴大者可治急灸腎俞百壯若齒黃赤鬢髮  
直面土色者不可治也若肺中風偃臥而胷滿短氣冒

悶汗出視目下鼻上下兩邊下行至口色白可治急灸  
肺俞百壯若色黃爲肺已傷化爲血不可治其人當妄  
撥空或自拈衣如此數日而死任娠而中風非止任婦  
爲病甚者損胎也

任娠瘧候

體虛受風而傷太陽之經停滯經絡後復遇寒濕相搏  
發則口噤背強名之爲瘧任娠而發者悶冒不識人須  
臾醒復發亦是風傷太陽之經作瘧也亦名子癩亦  
名子冒也

任娠鬼胎候

夫人腑臟調和則血氣充實風邪鬼魅不能干之若榮



衛虛損則精神衰弱妖魅鬼精得入於藏狀如懷娠故曰鬼胎也

任娠兩胎一生一死候

陽施陰化精盛有餘者則成兩胎胎之在胞以血氣資養若寒溫節適虛實調和氣血強盛則胎無傷夭若冷熱失宜氣血損弱則胎翳燥不育其兩胎而一死者是血過於寒其經養不周故偏夭死也候其胎上冷是胎已死也

任娠胎痿燥候

胎之在胞血氣資養若血氣虛損胞藏冷者胎則翳燥委伏不長其狀兒在胎都不轉動日月雖滿亦不能生

是其候也而胎在內痿燥其胎多死

任娠過年久不產候

過年不產由挾寒冷宿血在胞而有胎則冷血相搏令胎不長產不以時若其胎在胞日月雖多其胎翳小轉動勞羸是挾於病必過時乃產

任娠墮胎後血出不止候

墮胎損經脈損經脈故血不止也瀉血多者便致煩悶乃至死也

任娠墮胎後血不出候

此由宿有風冷因墮胎血冷相搏氣虛逆上者則血結不出也其血逆上搶心則亦煩悶甚者致死

任娠墮胎衣不出候

此由墮胎初下婦人力羸不能更用氣產胞便遇冷冷則血澀故胞衣不出也若胞上掩心煩悶乃至於死也  
任娠墮胎後腹痛虛乏候

此由墮胎之時血下過少後餘血不盡將攝未復而勞傷氣力觸冒風冷風冷搏於血氣故令腹痛勞傷血氣不復則虛乏而餘血不盡結搏於內多變成血瘕亦令月水不通也

任娠墮胎後著風候

墮胎後榮衛損傷腠理虛疎未得平復若起早當風取涼卽著於風初止羸弱或飲食減少氣力不卽平復若

風挾冷入腹內搏於血結成刺痛若入腸胃亦下利入  
經絡或痺或疼痛若入太陽之經則腰背強直成瘕或  
角弓反張或口喎僻或緩弱不隨或一邊攣急各隨所  
傷處而成病也

任娠欲去胎候

此謂任娠之人羸瘦或挾疾病既不能養胎兼害任婦  
故去之

五七

五前并藏之人贏戲延楚來歸到不斬妻以兼其

其藏於志韻刻

其其節如神也

其已又兼延日融論延雖不謂其一身學志有然則

聲餘延與延幾無苦人太尉之晉順武首照院南建德  
風其令人與內辨其血餘如陳詠芥人馴習周氏校刊

巢氏諸病源候總論卷四十三

婦人將產病諸候

凡三論

產法

人處三才之間稟五行之氣陽施陰化故令有子然五行雖復相生而剛柔刑殺互相害剋至於將產則有日遊反支禁忌若犯觸之或橫致諸病故產時坐臥產處須順四時五行之氣故謂之產法也

產防運法

防運者諸臨產若觸犯日遊反支諸所禁忌則令血氣不調理而致運也其運之狀心煩悶氣欲絕是也故須預以法術防之

胞衣不出候

有產兒下苦胞衣不落者世謂之息胞由產婦初時用力比產兒出而體已疲頓不能更用氣產胞經停之間外冷乘之則血道否澀故胞久不出彌須急以方藥救治不爾害於兒所以爾者胞系連兒臍胞不出則不得以時斷臍浴洗冷氣傷兒則成病也舊方胞衣久不出恐損兒者依法截臍而以物繫其帶一頭亦有產而看產人不用意慎護而挽牽甚胞系斷者其胞上掩心則斃人也縱令不死久則成病也

婦人難產病諸候

凡七論

產難候

婦人難產病諸候

產難者或先因漏胎去血臟燥或子臟宿挾疹病或觸  
禁忌或始覺腹痛產時未到便卽驚動穢露早下致子  
道乾澀產婦力疲皆令難也候其產婦舌青者兒死母  
活脣青口青口兩邊沫出者子母俱死面青舌赤沫出  
者母死子活故將產坐臥產處須順四時方面并避五  
行禁忌若有犯觸多令產難產婦腹痛而腰不痛者未  
產也若腹痛連腰甚者卽產所以然者腎候於腰胞繫  
於腎故也診其尺脈轉急如切繩轉珠者卽產也

橫產候

橫產由初覺腹痛產時未至驚動傷早兒轉未竟便用  
力產之故令橫也或觸犯禁忌所爲將產坐臥產處須



順四時方面并避五行禁忌若觸犯多致災禍也

### 逆產候

逆產者初覺腹痛產時未至驚動傷早兒轉末竟用力產之則令逆也或觸犯禁忌故產處及坐臥須順四時方面并避五行禁忌若觸犯多致災禍也

養生方云任娠大小便勿至非常之去處必逆產殺人

### 產子上逼心候

任娠將養得所則氣血調和故兒在胎則安當產亦易若節適失宜則血氣乖理兒在胎則亟動至產育亦難產而子上迫於心者由產難用力胎動氣逆胎上衝迫

於心也凡胎上迫於心則暴悶絕胎下乃甦甚者至死  
凡產處及坐臥須順四時方面并避五行禁忌若有觸  
犯多致災禍也

產子但趨後孔候

產子但趨後孔者內坐臥未安恩遽强嘔氣暴衝擊故  
兒失其道婦人產有坐有臥若坐產者須正坐傍人扶  
抱肋腰持捉之勿使傾斜故兒得順其理臥產者亦待  
臥定背平著席體不偃曲則兒不失其道若坐臥未安  
身體斜曲兒身轉動恩遽强嘔氣暴衝擊則令兒趨後  
孔或橫或逆皆由產時恩遽或觸犯禁忌坐臥不安審  
所爲故產坐臥須平正順四時方面避五行禁忌若有

觸犯多致災禍也

產已死而子不出候

產婦已死而子不出或觸犯禁忌或產時未到驚動傷  
早或傍看產人抱腰持捉失理皆令產難而致胎上掩  
心悶絕故死也候其婦將困乏之際面青舌赤口沫出者  
則母死兒活也故產處坐臥須順四時方面避五行禁  
忌若有觸犯多招災禍也

產難子死腹中候

產難子死腹中者多因驚動過早或觸犯禁忌致令產  
難產難則穢沃下產時未到穢露已盡而胎枯燥故子  
死腹中候其產婦舌青黑及胎上冷者子已死也故產

處坐臥須順四時方面避五行禁忌若有觸犯多招災禍也

婦人產後病諸候

上

凡三十論

產後血運悶候

命風令轉氣血血脈壅滯不宜

運悶之狀心煩氣欲絕是也亦有去血過多亦有下血極少皆令運若產去血過多血虛氣極如此而運悶者但煩悶而已若下血過少而氣逆者則血隨氣上掩於心亦令運悶則煩悶而心滿急二者爲異亦當候其產婦血下多少則知其產後應運與不運也然煩悶不止則斃人凡產時當向坐臥若觸犯禁忌多令運悶故血下或多或少是以產處及坐臥須順四時方面避五行

禁忌若有觸犯多招災禍也

產後血露不盡候

凡任娠當風取涼則胞絡有冷至於產時其血下必少  
或新產而取風涼皆令風冷搏於血致使血不宣消蓄  
積在內則有時血露淋瀝下不盡

產後惡露不盡腹痛候

任娠取風冷過度胞絡有冷比產血下則少或新產血  
露未盡而取風涼皆令風冷搏於血血則壅滯不宣消  
蓄積在內內有冷氣共相搏擊故令痛也甚者則變成  
血瘕亦令月水不通也

產後血上搶心痛候

產後氣虛挾宿寒寒搏於血血則凝結不消氣逆上者則血隨上搶衝擊而心痛也凡產餘血不盡得冷則結與氣相搏則痛因重遇於寒血結彌甚變成血瘕亦令月水否澀不通

半產候

半產謂任娠兒骨節腑臟漸具而日月未足便產也多因勞役驚動所致或觸犯禁忌亦然也

產後血瘕痛候

新產後有血氣相擊而痛者謂之瘕痛瘕之言假也謂其痛浮假無定處也此由宿有風冷血氣不治至產血下少故致此病也不急治多成積結妨害月水輕則否

澀重則不通

產後風虛腫候

夫產傷血勞氣腠理則虛爲風邪所乘邪搏於氣不得宣泄故令虛腫輕浮如吹者是邪搏於氣氣腫也若皮薄如熟李狀則變爲水腫也氣腫發汗卽愈水腫利小便卽瘥

產後腹中痛候

產後臟虛或宿挾風寒或新觸冷與氣相擊搏故腹痛若氣逆上者亦令心痛胃脇痛也久則變成疝瘕

產後心腹痛候

產後氣血俱虛遇風寒乘之與血氣相擊隨氣而上衝

於心或下攻於腹故令心腹痛苦久痛不止則變成疝  
瘕

產後心痛候

產後臟虛遇風冷客之與血氣相搏而氣逆者上攻於  
心之絡則心痛凡心痛乍間乍甚心之支別絡爲邪所  
傷也若邪傷心之正經爲真心痛朝發夕死夕發朝死  
所以然者心爲諸臟之主不受邪邪傷卽死也

產後小腹痛候

此由產時惡露下少胞絡之間有餘血者與氣相擊搏  
令小腹痛也因重遇冷則血結變成血瘕亦令月水不  
利也



產後腰痛候

腎主腰脚而婦人以腎繫胞產則勞傷腎氣損動胞絡  
虛未平復而風冷客之冷氣乘腰者則令腰痛也若寒  
冷邪氣連滯腰脊則痛久不已後有娠喜墮胎所以然  
者胞繫腎腎主腰脊也

產後兩脅腹滿痛候

膀胱宿有停水因產惡露下少血不宣消水血壅否與  
氣相搏積在膀胱故令脅腹俱滿而氣動與水血相擊  
則痛也故令兩脅腹滿痛亦令月水不利亦令成血瘕  
也

產後虛煩短氣候

此由產時勞傷重者血氣虛極則其後未得平和而氣逆乘心故心煩也氣虛不足故短氣也

產後上氣候

肺主氣五臟六腑俱稟氣於肺產則氣血俱傷臟腑皆損其後肺氣未復虛竭逆上故上氣也

產後心虛候

肺主氣心主血脈而血氣通榮腑臟徧循經絡產則血氣傷損臟腑不足而心統領諸臟其勞傷不足則令驚悸恍惚是心氣虛也

產後虛煩候

產血氣俱傷臟腑虛竭氣在內不宣故令煩也

產後虛熱候

產後腑臟勞傷血虛不復而風邪乘之搏於血氣使氣不宣泄而否澀生熱或支節煩憤或昏乾燥但因虛生熱故謂之虛熱也

產後虛羸候

夫產損動腑臟勞傷氣血輕者節養將攝滿月便得平復重者其日月雖滿氣血猶未調和故虛羸也然產後虛羸將養失所多沈滯勞瘠乍起乍臥風冷多則辟瘦顏色枯黑食飲不消風熱多則脹退虛乏顏色無異於常食亦無味甚傷損者皆著牀此勞瘠也

產後風冷虛勞候

產後風冷虛勞候

產則血氣勞傷腑臟虛弱而風冷客之風冷搏於血氣  
血氣不能自溫於肌膚使人虛乏疲頓致羸損不平復  
謂之風冷虛勞若久不瘥風冷乘虛而入腹搏於血則  
否澀入腸則下利不能養或食不消入子臟則胞臟冷  
亦使無子也

### 產後汗出不止候

夫汗由陰氣虛而陽氣加之裏虛表實陽氣獨發於外  
故汗出也血爲陰產則傷血是爲陰氣虛也氣爲陽其  
氣實者陽加於陰故令汗出而陰氣虛弱不復者則汗  
出不止也凡產後皆血虛故多汗因之遇風則變爲瘧  
縱不成瘧則虛乏短氣身體柴瘦脣口乾燥久變經水

斷絕津液竭故也

產後汗血候

肝藏血心主血脈產則勞損肝心傷動血氣血爲陰陰虛而陽氣乘之卽令汗血此爲陰氣大虛血氣傷動故因汗血出乃至斃人

產後虛渴候

夫產水血俱下腑臟血燥津液不足宿挾虛熱者燥竭則甚故令渴

產後餘疾候

產後餘疾由產勞傷腑臟血氣不足日月未滿而起早勞役虛損不復爲風邪所乘令氣力疲乏肌肉柴瘦若

氣冷入於腸胃腸胃虛冷時變下利若入搏於血則經水否澀冷搏氣血亦令腹痛隨腑臟虛處乘虛傷之變成諸疾以其因產傷損餘勢不復致羸瘠疲頓乍瘥乍甚故謂產後餘疾也

產後中風候

產則傷動血氣勞損腑臟其後未平復起早勞動氣虛而風邪乘虛傷之致發病者故曰中風若風邪冷氣初客皮膚經絡疼痺不仁若乏少氣其人筋脈挾寒則攣急喎僻挾濕則強脈緩弱若入傷諸臟腑恍惚驚悸隨其所傷腑臟經絡而爲諸疾凡中風風先客皮膚後因虛入傷五臟多從諸臟俞入若心中風但得偃臥不得

傾側汗出若脣赤汗流者可治急灸心俞百壯脣或青  
或白或黃或黑此是心壞爲水面目亭亭時悚動皆不  
可復治五六日而死者肝中風踞坐不得低頭若繞兩  
目連額上色微有青脣青面黃可治急灸肝俞百壯若  
大青黑面一黃一白者是肝已傷不可復治數日而死  
若脾中風踞而腹滿體通黃吐鹹水出可治急灸脾俞  
百壯若手足青者不可復治也腎中風踞而腰痛視脅  
左右未有黃色如餅飴大者可治急灸腎俞百壯若齒  
黃赤鬢髮直面土色不可復治也肺中風偃臥而脅滿  
短氣冒悶汗出視目下鼻上下兩邊下行至口色白可  
治急灸肺俞百壯若色黃爲肺已傷化爲血而不可復

治其人當妄掇空或自拈衣如此數日而死

產後中風口噤候

產後中風口噤者是其氣虛而風入於頷頰夾口之筋也手三陽之筋結入於頷產則勞損腑臟傷動筋脈風乘之者其三陽之筋偏虛則風偏搏之筋得風冷則急故令口噤也

產後中風瘳候

產後中風瘳者因產傷動血脈臟腑虛竭飲食未復未滿日月榮衛虛傷風氣得入五臟傷太陽之經復感寒濕寒搏於筋則發瘳其狀口急噤背強直搖頭馬鳴腰為反折須臾十發氣急如絕汗出如雨手拭不及者皆



死

產後中柔風候

柔風者四肢不收或緩或急不得俛仰也由陰陽俱虛風邪乘之風入於陽則表緩四肢不收也入於陰則裏急不得俛仰也產則血氣皆損故陰陽俱虛未得平復而風邪乘之故也

產後中風不隨候

產後腑臟傷動經絡虛損日月未滿未得平復而起早勞動風邪乘虛入邪搏於陽經者氣行則遲機關緩縱故令不隨也

產後風虛癩狂候

產後血氣俱虛受風邪入并於陰則癲忽發臥地吐涎  
口喎目急手足繚左右無所覺知良久乃甦是也邪入  
并於陽則狂發則言語倒錯或自高賢或罵詈不避尊  
卑是也產則傷損血氣陰陽俱虛未平復者爲風邪所  
乘邪乘血氣乍并於陽乍并於陰故癲狂也

張振傑 血氣平 共似關平 共似劍 姑蘇玉出

厚年 血氣平 共似關平 共似劍 姑蘇玉出

天似劍 姑蘇玉出 共似關平 共似劍 姑蘇玉出

口神自急 手似絲 古無視 覺狀夏人 凡類 皖南建德

血氣平 血氣平 血氣平 血氣平 血氣平 周氏校刊

巢氏諸病源候總論卷四十四

婦人產後病諸候下凡四十一論

產後月水不利候

手太陽少陰之經主下爲月水太陽小腸之經少陰心之經也心主血脈因產傷動血氣其後虛損未復而爲風冷客於經絡冷搏於血則血凝澀故令月水不利也

產後月水不調候

夫產傷動血氣虛損未復而風邪冷熱之氣客於經絡乍冷乍熱冷則血結熱則血消故令血或多或少乍在月前乍在月後故爲不調也

夫產後月水不通候

夫產傷動血氣其後虛損未平復爲風冷所傷血之爲  
性得冷則凝結故風冷傷經血結於胞絡之間故令月  
水不通也凡血結月水不通則變成血瘕水血相并後  
遇脾胃衰弱肌肉虛者變水腫也

產後帶下候

帶下之病由任脈虛損任脈爲經絡之海產後血氣勞  
損未平復爲風冷所乘傷於任脈冷熱相交冷多則白  
多熱多則赤多也相兼爲帶下也

又云帶下有三門一曰胞門二曰龍門三曰玉門產後  
屬胞門謂因產傷損胞絡故也

產後崩中惡露不盡候

產傷於經血其後虛損未平復或勞役損動而血暴崩下遂因淋瀝不斷時來故謂崩中惡露不盡凡崩中若小腹急滿爲內有瘀血不可斷之斷之終不斷而加小腹脹滿爲難愈若無瘀血則可斷易治也

### 產後利候

產後虛損未平復而起早傷於風冷風冷乘虛入於大腸腸虛則泄故令利也產後利若變爲血利則難治世謂之產子利也

### 產後利腫候

因產勞傷榮衛脾胃虛弱風冷乘之水穀不結大腸虛則洩成利也利而腫者脾主土候肌肉土性本剋水今

脾氣衰微不能剋消於水水氣流溢散在皮膚故令腫也

### 產後虛冷洞利候

產勞傷而血氣虛極風冷乘之入於腸胃腸胃虛而暴得冷腸虛則泄遇冷極虛故變洞利也

### 產後滯利候

產後虛損冷熱之氣客於腸胃熱乘血血滲於腸則赤冷搏腸間津液則變白其冷熱相交故赤白相雜連滯不止故謂滯利也

### 產後冷熱利候

產後臟虛而冷熱之氣入於腸胃腸虛則泄故成冷熱

利凡利色青與白爲冷黃與赤爲熱久不止熱甚則變  
生血冷極則生白膿膿血相雜冷熱不調則變滯利也  
產後客熱利候  
產後臟虛而熱氣乘之熱入於腸腸虛則洩故爲客熱  
利色黃是也熱甚則黃赤而有血也

產後赤利候

赤利血利也因產後血虛爲熱氣所乘熱搏血滲入腸  
腸虛而洩爲血利凡血利皆是多熱熱血不止蘊瘀成  
膿血利也

產後陰下脫候

產而陰脫者由宿有虛冷因產用力過度其氣下衝則



陰下脫也

產後陰道痛腫候

臟氣宿虛因產風邪乘於陰邪與血氣相搏在其腠理故令痛血氣爲邪所壅否故腫也

產後陰道開候

子臟宿虛因產冷氣乘之血氣得冷不能相榮故令開也

產後遺尿候

因產用氣傷於膀胱而冷氣入胞囊胞囊缺漏不禁小便故遺尿多因產難所致

產後淋候

因產虛損而熱氣客胞內虛則起數熱則洩少故成淋也

產後渴利候

渴利者渴而引飲隨飲隨小便而謂之渴利也膀胱與腎爲表裏膀胱爲津液之府婦人以腎繫胞產則血水俱下傷損腎與膀胱之氣津液竭燥故令渴也而腎氣下通於陰腎虛則不能制水故小便數是爲渴利也

產後小便數候

胞內宿有冷因產氣虛而冷發動冷氣入胞虛弱不能制其小便故令數

產後尿血候

夫產後尿血候

夫產傷損血氣血氣則虛而挾於熱搏於血血得熱流散滲於胞故血隨尿出是爲尿血

產後大小便血候

夫產傷動血氣腑臟勞損血傷未復而挾於熱血得熱則妄行大腸及胞囊虛者則血滲入之故因大小便而血出也

產後大小便不通候

大小腸宿有熱因產則血水俱下津液暴竭本挾於熱大小腸未調和故令大小便澀結不通也

產後大便不通候

腸胃本挾於熱因產又水血俱下津液竭燥腸胃否澀

熱結腸胃故大便不通也

產後小便不通候

因產動氣氣衝於胞胞轉屈辟不得小便故也亦有小腸本挾於熱因產水血俱下津液竭燥胞內熱結則小便不通也然胞轉則小腹脹滿氣急絞痛若虛熱津液竭燥者則不甚脹急但不通津液生氣和則小便也

產後小便難候

產則津液空竭血氣皆虛有熱客於胞者熱停積故小便否澀而難出

產後嘔候

胃爲水穀之海水穀之精以爲血氣血氣榮潤腑臟因

產則腑臟傷動有血虛而氣獨盛者氣乘腸胃腸胃燥  
澀其氣則逆故嘔不下食也

產後欬嗽候

肺感微寒則成欬嗽而肺主氣因產氣虛風冷傷於肺  
故令欬嗽也

產後時氣熱病候

四時之間忽有非節之氣而爲病者謂之時氣產後體  
虛而非節之熱氣傷之故爲產後時氣熱病也診其脈  
弦小者足溫則生足寒則死凡熱病脈應浮滑而反懸  
急爲不順手足應溫而反冷爲四逆必死也

產後傷寒候

觸冒寒氣而爲病謂之傷寒產婦血氣俱虛日月未滿而起早勞動爲寒所傷則嗇嗇惡寒吸吸微熱數日乃歇重者頭及骨節皆痛七八日乃瘥也

### 產後寒熱候

因產勞傷血氣使陰陽不和互相乘剋陽勝則熱陰勝則寒陰陽相加故發寒熱凡產餘血在內亦令寒熱其腹時刺痛者是也

### 產後瘧候

夫瘧者由夏傷於暑客在皮膚至秋因勞動血氣腠理虛而風邪乘之動前暑熱正氣相擊陰陽交爭陽盛則熱陰盛則寒陰陽更盛故發寒熱陰陽相離則寒熱俱

歇若邪動氣至交爭復發故瘧休作有時其發時節漸  
晏者此由邪客於風府邪循脊而下衛氣一日一夜常  
大會於風府其明日下一節故其作日晏其發早者衛  
氣之行風府日下一節二十一日至尾骶二十二日入  
脊內上注於伏衝之脈其行九日出於缺盆之內其氣  
既上故其病發更早其間日發者由邪氣內薄五臟橫  
連募原其道遠其氣深其行遲不能日作故間日蓄積  
乃發產後血氣損傷而宿經傷暑熱今因產虛復遇風  
邪相折陰陽交爭邪正相干故發作成瘧也

產後積聚候

積者陰氣五臟所生聚者陽氣六腑所成皆由飲食失

節冷熱不調致五臟之氣積六腑之氣聚積者痛不離其部聚者其痛無有常處所以然者積爲陰氣陰性沈伏故痛不離其部聚爲陽氣陽性浮動故痛無常處產婦血氣傷損腑臟虛弱爲風冷所乘搏於臟腑與氣血相結故成積聚也

### 產後癥候

癥病之候腹內塊按之牢強推之不移動是也產後而有癥者由臟虛餘血不盡爲風冷所乘血則凝結而成癥也

### 產後癖候

癖病之狀脅下弦急刺痛是也皆由飲食冷熱不調停



積不消所成產後臟虛爲風冷搏於停飲結聚故成癖也

產後內極七病候

產後血氣傷竭爲內極七病則舊方所云七害也一者害食二者害氣三者害冷四者害勞五者害房六者害任七者害睡皆產時傷動血氣其後虛極未平復犯此十而生諸病凡產後氣血內極其人羸疲萎黃冷則心腹絞痛熱則肢體煩疼經血否澀變爲積聚癥瘕也

產後目瞑候

目不痛不腫但視物不明謂之目瞑肝藏血候應於目產則血虛肝氣不足故目瞑也

產後耳聾候

腎氣通耳而婦人以腎繫胞因產血氣傷損則腎氣虛其經爲風邪所乘故令耳聾也

產後虛熱口生瘡候

產後口生瘡者心藏虛熱心開竅於口而主血脈產則血氣虛臟有客熱氣上衝胃膈重發於口故生瘡也

產後身生瘡候

產則血氣傷損腠理虛爲風所乘風邪與血氣相搏臟腑生熱熏發肌膚故生瘡也

產後乳無汁候

婦人手太陽少陰之脈下爲月水上爲乳汁任娠之人

月水不通初以養胎既產則水血俱下津液暴竭經血不足者故無乳汁也

產後乳汁溢候

婦人手太陽少陰之脈上為乳汁其產雖血水俱下其經血盛者則津液有餘故乳汁多而溢出也

巢氏諸病源候總論卷四十五

小兒雜病諸候

凡二十九論

養小兒候

經說年六歲已上爲小兒十八已上爲少年二十已上爲壯年五十已上爲老年也其六歲已還者經所不載是以乳下嬰兒病難治者皆無所承按故也中古有巫方立小兒顛顛經以占天壽判疾病死生世所相傳有小兒方焉逮乎晉宋推諸蘇家傳襲有驗流於人間小兒始生肌膚未成不可暖衣暖衣則令筋骨緩弱宜時見風日若都不見風日則令肌膚脆軟便易傷損皆當以故絮著衣莫用新綿也天和暖無風之時令母將抱

病源傳論 卷四 一五  
日中嬉戲數見風日則血凝氣剛肌肉硬密堪耐風寒  
不致疾病若常藏在幃帳之內重衣溫暖譬如陰地之  
草木不見風日軟脆不任風寒又當薄衣薄衣之法當  
從秋習之不可以春夏卒減其衣則令中風寒從秋習  
之以漸稍寒如此則必耐寒冬月但當著兩薄襦一複  
裳耳非不忍見其寒適當佳耳愛而暖之適所以害也  
又當消息無令汗出汗出則致虛損便受風寒盡夜寤  
寐皆當慎之其飲乳食哺不能無痰癖常當節適乳哺  
若微不進仍當將護之凡不能進乳哺則宜下之如此  
則終不致寒熱也又小兒始生氣尚盛無有虛勞微  
惡則須下之所損不足言及其愈病則致深益若不時

下則成大疾疾成則難治矣其冬月下之難將護然有疾者不可不下夏月下之後腹中常當小脹滿故當節哺乳將護之數日間又節哺之當令多少有常劑兒稍大食哺亦當稍增若減少者此是腹中已有小不調也便當微將藥勿復哺之但當乳之甚者十許日輕者五六日自當如常若都不肯食哺而但飲乳者此是有癖爲疾重要當下之不可不下不下則致寒熱或吐而發痢或致下利此皆病重不早下之所爲也則難治先治其輕時兒不耗損而病速除矣小兒所以少病痢者其母懷娠時時勞役運動骨血則氣強胎養盛故也若侍御多血氣微胎養弱則兒軟脆易傷故多病痢兒皆須

著帽項衣取燥菊花爲枕枕之兒母乳兒三時摸兒項  
風池若壯熱者卽須熨使微汗微汗不瘥便灸兩風池  
及背第三椎第五椎第七椎第九椎兩邊各二壯與風  
池凡爲十壯一歲兒七壯兒大者以意節度增壯數可  
至三十壯惟風池特令多七歲已上可百壯小兒常須  
慎護風池諺云戒養小兒慎護風池風池在頸項筋兩  
轅之邊有病乃治之疾微慎不欲妄針灸亦不用輒吐  
下所以然者針灸傷經絡吐下動腑臟故也但當以除  
熱湯浴之除熱散粉之除熱赤膏摩之又以臍中膏塗  
之令兒在涼處勿禁水洗常以新水洗新生無疾慎不  
可逆針灸逆針灸則忍痛動經脈因喜成癇河洛間土

地多寒兒喜病瘳其俗生兒三日喜逆灸以防之又灸  
頰以防噤凡噤者舌下脈急牙車筋急其土地寒皆決  
舌下去血灸頰以防噤江東地溫無此疾古方既傳有  
逆針灸之法今人不詳南北之殊便按方用之多害於  
小兒是以田舍小兒任自然皆得無橫夭又云春夏決  
定不得下小兒所以爾者小兒腑臟之氣軟弱易虛易  
實下則下焦必益虛上焦生熱熱則增痰痰則成病自  
非當病不可下也

### 變蒸候

小兒變蒸者以長血氣也變者上氣蒸者體熱變蒸有  
輕重其輕者體熱而微驚耳冷體亦冷上唇頭白泡起



如死魚目珠子微汗出而近者五日而歇遠者八九日  
乃歇其重者體壯熱而脈亂或汗或不汗不欲食食輒  
吐覘無所苦也變蒸之時目白睛微赤黑睛微白亦無  
所苦蒸畢自明了矣先變五日後蒸五日爲十日之中  
熱乃除變蒸之時不欲驚動勿令傍邊多人變蒸或早  
或晚依時如法者少也初變之時或熱甚者違日數不  
歇審計日數必是變蒸服黑散發汗熱不止者服紫雙  
丸小瘥便止勿復服之其變蒸之時遇寒加之則寒熱  
交爭腹痛天矯啼不止者熨之則愈變蒸與溫壯傷寒  
相似若非變蒸身熱耳熱髑亦熱此乃爲他病可爲餘  
治審是變蒸不得爲餘治其變日數從初生至三十二

日一變六十四日再變變且蒸九十六日三變變者丹  
孔出而泄也至一百二十八日四變變且蒸一百六十  
日五變一百九十二日六變變且蒸二百二十四日七  
變二百五十六日八變變且蒸二百八十八日九變三  
百二十日十變變且蒸積三百三十日小蒸畢後六十  
四日大蒸後百二十八日復蒸積五百七十六日大小  
蒸畢也

温壯候

小兒温壯者由腑臟不調內有伏熱或挾宿寒皆搏於  
胃氣足陽明爲胃之經主身之肌肉其胃不和調則氣  
行壅澀故蘊積體熱名爲温壯候小兒大便其糞黃而

臭此腹內有伏熱宜將服龍鬚湯若糞白而酢臭則挾宿寒不消當服紫雙丸輕者少服藥令默除之甚者小增藥令微利皆當節乳哺數日令胃氣和調若不節乳哺則病易復復則傷其胃氣令腹滿再三利尚可過此則傷小兒矣

### 壯熱候

小兒壯熱者是小兒血氣盛五臟生熱熏發於外故令身體壯熱大體與溫壯相似而有小異或挾伏熱或挾宿寒其挾伏熱者大便黃而臭挾宿寒者糞白而有酸氣此二者府藏不調冷熱之氣俱乘腸胃蘊積染漸而發溫溫然熱不甚盛是溫壯也其壯熱者是血氣盛熏

發於外其發無漸壯熱甚以此爲異若壯熱不歇則變爲驚極重者亦變癇也

驚候

小兒驚者由血氣不和熱實在內心神不定所以發驚甚者掣縮變成癇又小兒變蒸亦微驚所以然者亦由熱氣所爲但須微發驚以長血脈不欲大驚大驚乃灸驚脈若五六十日灸者驚復更甚生百日後灸驚脈乃善耳

欲發癇候

夫小兒未發癇欲發之候或溫壯連滯或搖頭弄舌或睡裏驚掣數齧齒如此是欲發癇之證也

癇候

癇者小兒病也十歲已上為癲十歲已下為癇其發之狀或口眼相引而目睛上搖或手足掣縱或背脊強直或頸項反折諸方說癲名證不同大體其發之源皆因三種三種者風癲驚癲食癲是也風癲者因衣厚汗出而風入為之驚癲者因驚怖大啼乃發食癲者因乳哺不節所成然小兒氣血微弱易為傷動因此三種變作諸癇凡諸癇正發手足掣縮慎勿捉持之捉則令曲突不隨也

發癇瘥後身體頭面悉腫滿候

凡癇發之狀或口眼相引或目睛上搖或手足掣縱或

背脊強直或頭項反折或屈指如數皆由以兒當風取涼乳哺失節之所爲也其癩瘥後而腫滿者是風癩風癩因小兒厚衣汗出因風取涼而得之初發之狀屈指如數然後掣縮是也其癩雖瘥氣血尙虛而熱未盡在皮膚與氣相搏致令氣不宣泄故停并成腫也

發癩瘥後六七歲不能語候

凡癩發之狀口眼相引或目睛上搖或手足瘳癱或脊背強直或頭項反折或屈指如數皆由以兒當風取涼乳哺失節所爲也而癩發瘥後不能語者是風癩風癩因兒衣厚汗出以兒乘風取涼太過爲風所傷得之其初發之狀屈指如數然後發瘳癱是也心之聲爲言開

癆於口其癩發雖止風冷之氣猶滯心之絡脈使心氣不和其聲不發故不能言也

### 驚癩候

驚癩者起於驚怖大啼精神傷動氣脈不定因驚而發作成癩也初覺兒欲驚急持抱之驚自止故養小兒常慎驚勿聞大聲每持抱之間常當安徐勿令怖又雷鳴時常塞兒耳并作餘細聲以亂之驚癩當按圖灸之摩膏不可大下何者驚癩心氣不定下之內虛則甚難治凡諸癩正發手足掣縮慎不可捉持之捉之則令曲突不隨也

### 風癩候

風癇者由乳養失理血氣不和風邪所中或衣厚汗出  
腠理開風因而入初得之時先屈指如數乃發掣縮是  
也當與純心湯又病先身熱瘈瘲驚啼喚而後發癇脈  
浮者爲陽癇內在六府外在肌膚猶易治病先身冷不  
驚瘈不啼喚乃成病發時脈沈者爲陰癇內在五藏外  
在骨髓極者難治病發時身軟時醒者謂之癇身強直  
反張如尸不時醒者謂之瘈診其心脈滿大癇瘈筋攣  
肝脈小急亦癇瘈筋攣尺寸脈俱浮直上直下此爲督  
脈腰背強直不得俛仰小兒風癇三部脈緊急癇可治  
小兒脈多似雀鬪要以三部脈爲主若緊者必風癇凡  
諸癇發手足掣縮慎勿持之捉則令曲突不隨也



患癩瘡後更發候

癩發之狀或口眼相引目睛上搖或手足痠癢或背脊強直或頭項反折或屈指如數皆由富風取涼乳哺失節之所爲其瘡之後而更發者是餘勢未盡小兒血氣軟弱或因乳食不節或風冷不調或更驚動因而重發如此者多成常疹凡諸癩正發手足掣縮慎勿持之捉則令曲突不隨也

傷寒候

傷寒者冬時嚴寒而人觸冒之寒氣入腠理搏於血氣則發寒熱頭痛體疼謂之傷寒又春時應暖而反寒此非其時有其氣傷人卽發病謂之時行傷寒者小兒不

能觸冒寒氣而病傷寒者多由大人解脫之時久故令  
寒氣傷之是以小兒亦病之診其脈來一投而止者便  
是得病一日假令六投而止者便是得病六日其脈來  
洪者易治細微者難治也

傷寒解肌發汗候

傷寒是寒氣客於皮膚寒從外搏於血氣腠理閉密冷  
氣在內不得外泄蘊積故頭痛壯熱體疼所以須解其  
肌膚令腠理開津液爲汗發泄其氣則熱歇凡傷寒無  
間長幼男女於春夏宜發汗又脈浮大宜發汗所以然  
者病在表故也

傷寒挾實壯熱候

傷寒是寒氣客於皮膚搏於血氣腠理閉密氣不宣泄  
蘊積生熱故頭痛體疼而壯熱其人本藏氣實者則寒  
氣與實氣相搏而壯熱者謂之挾實實者有二種有冷  
有熱其熱實糞黃而臭其冷實食不消糞白而酸氣此  
候知之其內雖有冷熱之殊外皮膚皆壯熱也

傷寒兼驚候

傷寒是寒氣客於皮膚搏於血氣使腠理閉密氣不宣  
泄蘊積生熱故頭疼體痛而壯熱也其兼驚者是熱乘  
心心主血脈小兒血氣軟弱心神易動爲熱所乘故發  
驚驚不止則變驚癇也

傷寒大小便不通候

傷寒是寒氣客於皮膚搏於血氣使腠理閉密不宣泄  
蘊積生熱故頭痛體疼而壯熱其大便不通是寒搏於  
氣而生熱熱流入大小腸故澀結不通凡大小便不通  
則內熱不歇或乾嘔或言語而氣還逆上則心腹脹滿  
也

傷寒腹滿候

傷寒是寒氣客於皮膚搏於血氣使腠理閉密氣不宣  
泄蘊積生熱故頭痛體疼而壯熱其腹滿者是熱入腹  
傳於藏藏氣結聚故令腹滿若挾毒者則腹滿心煩懊  
悶多死

傷寒咽喉痛候

傷寒是寒氣客於皮膚搏於血氣使腠理閉密氣不宣  
泄蘊積生熱故頭痛體疼壯熱其咽喉痛者是心胃熱  
盛氣上衝於咽喉故令痛若挾毒則喉痛結腫水漿不  
入毒還入心煩悶者死

傷寒嗽候

傷寒是寒氣客於皮膚搏於血氣使腠理閉密氣不宣  
泄蘊積生熱故頭痛體疼而壯熱其嗽者邪在肺肺候  
身之皮毛而主氣傷寒邪氣先客皮膚隨氣入肺故令  
嗽重者有膿血也

傷寒後嗽候

傷寒是寒氣客於皮膚搏於血氣使腠理閉密氣不宣

泄蘊積生熱故頭痛壯熱體疼也瘥後而猶嗽者是邪氣猶停在肺未盡也寒之傷人先客皮毛皮毛肺之候肺主氣寒搏肺氣入五藏六腑故表裏俱熱熱退之後肺尙未和邪猶未盡邪隨氣入肺與肺氣相搏故傷寒後猶病嗽也

### 傷寒汗出候

傷寒者是寒氣客於皮膚搏於血氣使腠理閉密氣不宣泄蘊積生熱故頭痛體疼壯熱也而汗出者陽虛受邪邪搏於氣故發熱陰氣又虛邪又乘於陰陰陽俱虛不能制其津液所以傷寒而汗出也

### 傷寒餘熱往來候

傷寒是寒氣客於皮膚搏於血氣腠理閉密氣不宣泄  
蘊積生熱使頭痛體疼而壯熱也其餘熱往來者是邪  
氣與正氣交爭正氣勝則邪氣卻散故寒熱俱歇若邪  
氣未盡者時干於正氣正氣爲邪氣所干則壅否還熱  
故餘熱往來不已也

傷寒已得下後熱不除候

傷寒是寒氣客於皮膚搏於血氣使腠理閉密不得宣  
泄蘊積生熱故頭痛體疼而壯熱也若四五日後熱歸  
入裏則宜下之得利後熱猶不除者餘熱未盡故其狀  
肉常溫溫而熱也

傷寒嘔候

傷寒是寒氣客於皮膚搏於血氣腠理閉密氣不宣泄  
蘊積生熱故頭痛體疼而壯熱其嘔者是胃氣虛熱乘  
虛入胃胃得熱則氣逆故嘔也

傷寒熱渴候

傷寒是寒氣客於皮膚搏於血氣腠理閉密氣不宣泄  
蘊積生熱故頭痛體疼而壯熱其渴者是熱入臟腑得  
熱則津液竭燥故令渴也

傷寒口內生瘡候

傷寒是寒氣客於皮膚搏於血氣腠理閉密氣不宣泄  
蘊積生熱故頭痛體疼而壯熱其口內生瘡熱毒氣在臟  
上衝胃鬲氣發於口故生瘡也



傷寒鼻衄候

傷寒是寒氣客於皮膚搏於血氣腠理閉密氣不得宣泄蘊積毒氣故頭痛體疼而壯熱其鼻衄是熱搏於氣而乘於血也肺候身之皮毛其氣開竅於鼻寒先客於皮膚搏於氣而成熱熱乘於血血得熱而妄行發從鼻出者名鼻衄也凡候熱病而應衄者其人壯熱頻發汗不止或未及發汗而鼻燥喘息鼻氣鳴卽衄凡衄小兒止一升或數合則熱因之爲減若一升二升者死

傷寒後下利候

傷寒是寒氣客於皮膚搏於血氣使腠理閉密氣不宣泄蘊積毒氣頭痛體疼而壯熱也其熱歇後而利者是

熱從表入裏故也表熱雖得解而裏熱猶停腸胃與水  
穀相并腸胃虛則泄利其狀利色黃若壯熱不止則變  
爲血利若重遇冷則冷熱相加則變赤白瀉利也



巢氏諸病源候總論卷四十六

小兒雜病諸候

凡三十四論

時氣病候

時氣病者是四時之間忽有非節之氣如春時應暖而寒夏時應熱而冷秋時應涼而熱冬時應寒而溫其氣傷人爲病亦頭痛壯熱大體與傷寒相似無問長幼其病形證畧同言此時通行此氣故名時氣亦呼爲天行

天行病發黃候

四時之間忽有非節之氣傷人謂之天行大體似傷寒亦頭痛壯熱其熱入於脾胃停滯則發黃也脾與胃合俱象土其色黃而候於肌肉熱氣蘊積其色蒸發於外

故發黃也

時氣腹滿候

時氣之病是四時之間忽有非節之氣傷人其病狀似傷寒亦頭痛壯熱也而腹滿者是熱入腹與臟氣相搏氣否澀在內故令腹滿若毒而滿者毒氣乘心煩懊者死

時氣結熱候

時氣之病是四時之間忽有非節之氣傷人其病狀似傷寒亦頭痛壯熱熱入腹內與腑臟之氣相結謂之結熱熱則大小腸否澀大小便難而苦煩熱是也

敗時氣病候

時氣之病是四時之間忽有非節之氣傷人其病狀似傷寒亦頭痛壯熱若施治早晚失時投藥不與病相會致令病連滯不已乍瘥乍劇或寒或熱敗壞之證無常是也

時氣病兼瘧候

時氣之病是四時之間忽有非節之氣傷人其病狀似傷寒亦頭痛壯熱而又兼瘧者是日數未滿本常壯熱而邪不退或乘於陰或乘於陽其乘於陽陽爭則熱其乘於陰陰爭則寒陰陽之氣爲邪所并互相乘加故發寒熱成瘧也

時氣病得吐下後猶熱候

病源候論 卷四十一  
時氣之病是四時之間忽有非節之氣傷人其病似傷  
傷亦頭痛壯熱而得吐下之後壯熱猶不歇者是腸胃  
宿虛而又吐利則爲重虛其熱乘虛而入裏則表裏俱  
熱停滯不歇故雖吐下而猶熱也

時氣病後不嗜食面青候

時氣之病是四時之間忽有非節之氣傷人客於肌膚  
與血氣相搏故頭痛壯熱熱歇之後不嗜食而面青者  
是胃內餘熱未盡氣滿故不嗜食也諸陽之氣俱上榮  
於面陽虛未復本帶風邪風邪挾冷冷搏於血氣故令  
面青也

時氣病發復候

時氣之病發復者是四時之閒忽有非節之氣傷人客  
於肌膚搏於血氣蘊積則變壯熱頭痛熱退之後氣血  
未和腑臟熱勢未盡或起早勞動或飲食不節故其病  
重發謂之復也然發復多重於初病者血氣已虛重傷  
故也

溫病候

溫病者是冬時嚴寒人有觸冒之寒氣入肌肉當時不  
卽發至春得暖氣而發則頭痛壯熱謂之溫病又冬時  
應寒而反暖其氣傷人卽發亦使人頭痛壯熱謂之冬  
溫病凡邪之傷人皆由觸冒所以感之小兒雖不能觸  
冒其乳母抱持解脫不避風邪冷熱之氣所以感病也



病源候論 卷四十六  
三  
温病下利候

温病是冬時嚴寒人有觸冒之寒氣入肌肉當時不卽發至春成病得暖氣而發則頭痛壯熱謂之温病又冬時應寒而反温其氣傷人卽發成病使人頭痛壯熱謂之冬温病也其下利者是腸胃宿虛而感於温熱之病熱氣入於腸胃與水穀相搏腸虛則泄故下利也

温病鼻衄候

温病者是冬時嚴寒人有觸冒之寒氣入肌肉當時不卽發至春得暖氣而發則頭痛壯熱謂之温病又冬時應寒而反温其氣傷人卽發成病謂之冬温病並皆頭痛壯熱其鼻衄者熱乘於氣而入血也肺候身之皮毛

主於氣開竅於鼻溫病則邪先客皮膚而搏於氣結聚成熱熱乘於血血得熱則流散發從鼻出者爲衄也凡候熱病鼻欲衄其數發汗汗不出或初染病已來都不汗而鼻燥喘息鼻氣有聲如此者必衄也小兒衄止至一升數合熱因得歇若至一斗數升則死矣

溫病胸結候

溫病是冬時嚴寒人有觸冒之寒氣入肌肉當時不卽發至春得暖氣而發則頭痛壯熱謂之溫病又冬時應寒而反溫其氣傷人卽發成病謂之冬溫病並皆頭痛壯熱凡溫熱之病四五日之後熱入裏內熱腹滿者宜下之若熱未入裏而下之早者裏虛氣逆熱結胸上則

胸否滿短氣謂之結胸也

患斑毒病候

斑毒之病是熱氣入胃而胃主肌肉其熱挾毒蘊積於胃毒氣熏發於肌肉狀如蚊蚤所嚙赤斑起周匝徧體此病或是傷寒或時氣或溫病皆由熱不時歇故熱入胃變成毒及發斑也凡發赤斑者十生一死黑者十死一生

黃病候

黃病者是熱入脾胃熱氣蘊積與穀氣相搏蒸發於外故皮膚悉黃眼亦黃脾與胃合俱象土候肌肉其色黃故脾胃內熱積蒸發令肌膚黃此或是傷寒或時行或

溫病皆由熱不時解所以入胃也凡發黃而下利心腹滿者死診其脈沈細者死又有百日半歲小兒非關傷寒溫病而身微黃者亦是胃熱慎不可灸也灸之則熱甚此是將息過度所爲微薄其衣數與除熱粉散粉之自歇不得妄與湯藥及灸也

### 黃疸病候

黃疸之病由脾胃氣實而外有溫氣乘之變生熱脾與胃合候肌肉俱象土其色黃胃爲水穀之海熱搏水穀氣蘊積成黃蒸發於外身疼髀背強大小便澁皮膚面目齒爪皆黃小便如屋塵色著物皆黃是也小便宣利者易治若心腹滿小便澁者多難治也不渴者易治渴

者難治脈沈細而腹滿者死也

### 胎疸候

小兒在胎其母臟氣有熱熏蒸於胎至生下小兒體皆黃謂之胎疸也

### 瘧病候

瘧病者由夏傷於暑客於皮膚至秋因勞動血氣腠理虛而邪乘之動前暑熱正邪相擊陰陽交爭陽盛則熱陰盛則寒陰陽更盛更虛故發寒熱陰陽相離則寒熱俱歇若邪動氣至交爭復發故瘧休作有時其發時節漸晏者此由邪客於風府邪循脊而下衛氣一日一夜常大會於風府其明日日下一節故其作日晏其發早

者衛氣之行風府曰下一節二十一口下至尾骶二十  
二日入脊內上注於伏衝之脈其行九日出於缺盆之  
內其氣日上故其病發更早其閒日發者由邪氣內薄  
五臟橫連募原其道遠其氣深其行遲不能日作故閒  
日蓄積乃發也小兒未能觸冒於暑而亦病瘧者是乳  
母抱持解脫不避風者也

瘧後餘熱候

夫風邪所傷是客於皮膚而痰飲漬於臟腑致令血氣  
不和陰陽交爭若真氣勝則邪氣退邪氣未盡故發瘧  
也邪氣雖退氣血尙虛邪氣干於真氣臟腑壅否熱氣  
未散故餘熱往來也

病源何論 卷四十一  
患瘧後脇內結硬候

瘧是夏傷於暑熱客於皮膚至秋復爲風邪所折陰陽  
交爭故發寒熱其病正發寒熱交爭之時熱氣乘藏藏  
則燥而渴渴而引飲飲停成癖結於脇下故瘥後脇內  
結硬也

瘧後內熱渴引飲候

瘧病者是夏傷於暑熱客於皮膚至秋復爲風邪所折  
陰陽交爭故發寒熱成瘧凡瘧發欲解則汗汗則津液  
減耗又熱乘於臟藏虛燥其瘧瘥之後腑臟未和津液  
未復故內猶熱渴而引飲也若引飲不止小便澀者則  
變成癖也

寒熱往來候

風邪外客於皮膚內而痰飲漬於腑臟致令血氣不和  
陰陽更相乘剋陽勝則熱陰勝則寒陰陽之氣爲邪所  
乘邪與正相干陰陽交爭時發時止則寒熱往來也

寒熱往來五臟煩滿候

風邪外客於皮膚內而痰飲漬於腑臟致令血氣不和  
陰陽交爭故寒熱往來而熱乘五臟氣積不泄故寒熱  
往來而五臟煩滿

寒熱往來腹痛候

風邪外客於皮膚內而痰飲漬於腑臟血氣不和則陰  
陽交爭故寒熱往來而臟虛本挾宿寒邪入於臟與寒



相搏而擊於臟氣故寒熱往來而腹痛也

### 寒熱結實候

外爲風邪客於皮膚內而痰飲漬於腑臟使血氣不和  
陰陽交爭則發寒熱而臟氣本實復爲寒熱所乘則積  
氣在內使人胸脇心腹煩熱而滿大便苦難小便亦澁  
是爲寒熱結實

### 寒熱往來食不消候

風邪外客於皮膚內有痰飲漬於腑臟使血氣不和陰  
陽交爭則寒熱往來其脾胃之氣宿挾虛冷表雖寒熱  
而內冷發動故食不消也

### 寒熱往來能食不生肌肉候

風邪外客於皮膚內而痰飲漬於腑臟使血氣不和陰陽交爭故發寒熱往來胃氣挾熱熱則消穀穀消則引食陰陽交爭爲血氣不和血氣不和則不能充養身體故寒熱往來雖能食而不生肌肉也

胃中有熱候

小兒血氣俱盛者則腑臟皆實故胃中生熱其狀大便則黃四肢溫壯翕然體熱也

熱煩候

小兒臟腑實血氣盛者表裏俱熱則苦煩躁不安皮膚壯熱也

熱渴候

小兒血氣盛者則腑臟生熱熱則臟燥故令渴

中客忤候

小兒中客忤者是小兒神氣軟弱忽有非常之物或未  
經識見之人觸之與鬼神氣相忤而發病謂之客忤也  
亦名中客又名中人其狀吐下青黃白色水穀解離腹  
痛反倒天矯面變易五色其狀似癩但眼不上搖耳其  
脈弦急數者是也若失時不治久則難治若乳母飲酒  
過度醉及房勞喘後乳者最劇能殺兒也

為鬼所持候

小兒神氣軟弱精爽微羸而神魂被鬼所持錄其狀不  
覺有餘疾直爾萎黃多大啼喚口氣常臭是也

卒死候

小兒卒死者是三虛而遇賊風故無病倉卒而死也三虛者乘年之衰一也逢月之空二也失時之和三也有人因此三虛復爲賊風所傷使陰氣偏竭於內陽氣阻隔於外而氣壅閉陰陽不通故暴絕而死也若腑臟未竭良久乃蘇亦有兼挾鬼神氣者皆有頃邪退乃生也凡中客忤及中惡卒死而邪氣不盡停滯心腹久乃發動多變成注也

中惡候

小兒中惡者是鬼邪之氣卒中於人也無問大小若陰陽順理榮衛平和神守則強邪不干正若精氣衰弱則

鬼毒惡氣中之其狀先無他病卒然心腹刺痛悶亂欲  
死是也凡中惡腹大而滿脈緊大而浮者死緊細而微  
者生餘勢不盡停滯臟腑之間更發後變為注也

安知五出

又中惡卒死脈脈不盡者帶心煩人臥發  
熱本齊兼楚良脈涼者皆齊則脈強改坐出  
脈者乘車之疾一出發民之空二出夫耕之味三出  
小兒完飲者出三出而脈減風也無脈

皖南建德

周氏校刊

巢氏諸病源候總論卷四十七

小兒雜病諸候

三

凡四十五論

注候

注之言住也謂其風邪氣留人身內也人無問大小若血氣虛衰則陰陽失守風邪鬼氣因而客之留在肌肉之間連滯腑臟之內或皮膚掣動遊易無常或心腹刺痛或體熱皮腫沈滯至死死又注易傍人故爲注也小兒不能觸冒風邪多因乳母解脫之時不避溫涼暑濕或抱持出入早晚其神魂軟弱而爲鬼氣所傷故病也

尸注候

尸注者是五尸之中一尸注也人無問小大腹內皆有

尸蟲尸蟲爲性忌惡多接引外邪其爲患害小兒血氣衰弱者精神亦羸故尸注因而爲病其狀沈默不的知病處或寒熱淋瀝涉引歲月遂至於死死又注易傍人故名之爲尸注也

蠱注候

人聚蟲蛇雜類以器皿盛之令相噉食餘一存者卽名爲蠱能變化或隨飲食入腹食人五臟小兒有中者病狀與大人老子無異則心腹刺痛懊悶急者卽死緩者涉厯歲月漸深羸困食心藏盡利血心藏爛乃至死死又注易傍人故爲蠱注也

巢丹陰腫候

辨脈論卷四十五

論

足少陰爲腎之經其氣下通於陰小兒有少陰之經虛而受風邪者邪氣衝於陰與血氣相搏結則陰腫也

### 腹脹候

腹脹是冷氣客於藏故也小兒腑臟嫩弱有風冷邪氣客之搏於臟氣則令腹脹若脾虛冷移入於胃食則不消若腸虛冷氣乘之則變下利

### 霍亂候

霍亂者陰陽清濁二氣相干謂之氣亂氣亂於腸胃之間爲霍亂也小兒腸胃嫩弱因解脫逢風冷乳哺不消而變吐利也或乳母觸冒風冷食飲生冷物皆冷氣流入乳令乳變敗兒若飲之亦成霍亂吐利皆是觸犯腑



臟使清濁之氣相干故霍亂也挾風而絡實者則身發熱頭痛骨疼而復吐利凡小兒霍亂皆須暫斷乳亦以藥與乳母服令血氣調適乳汁溫和故也小兒吐利不止血氣變亂卽發驚癇也

### 吐利候

吐利者由腸虛而胃氣逆故也小兒有解脫而風冷入腸胃腸胃虛則泄利胃氣逆則嘔吐此大體與霍亂相似而小輕不劇悶頓故直云吐利亦不呼爲霍亂也

### 服湯中毒氣吐下候

春夏以湯下小兒其腸胃脆嫩不勝藥勢遂吐下不止藥氣薰臟腑乃煩懊頓乏者謂此爲中毒毒氣吐下也

嘔吐逆候

兒啼未定氣息未調乳母忽遽以乳飲之其氣尙逆乳  
不得下停滯胸膈則胸滿氣急令兒嘔逆變吐又乳母  
將息取冷冷氣入乳乳變壞不捨除之仍以飲兒冷乳  
入腹與胃氣相逆則腹脹痛氣息喘急亦令嘔吐又解  
脫換易衣裳及洗浴露兒身體不避風冷風冷因客膚  
腠搏血氣則冷入於胃則腹脹痛而嘔吐也凡如此風  
冷變壞之乳非直令嘔吐胃虛冷入於大腸則爲利也

噦候

小兒噦由哺乳冷冷氣入胃與胃氣相逆冷折胃氣不  
通則令噦也

吐血候

小兒吐血者是有熱氣盛而血虛熱乘於血血性得熱則流散妄行氣逆卽血隨氣上故令吐血也

難乳候

凡小兒初產看產人見兒出急以手料拭兒口無令惡血得入兒口則兒腹內調和無有疾病若料拭不及時則惡血穢露兒咽入腹令心腹否滿短氣兒不能飲乳謂之難乳

又云兒在胎之時母取冷過度冷氣入胞令兒著冷至兒生出則喜腹痛不肯飲乳此則胎寒亦名難乳也

吐覘候

小兒吐現者由乳哺冷熱不調故也兒乳哺不調則停積胸膈因更飲乳哺前後相觸氣不得宣流故吐現出診其脈浮者無苦也

百病候

小兒百病者由將養乖節或犯寒溫乳哺失時乍傷飢飽致令血氣不理腸胃不調或欲發驚癇或欲成伏熱小兒氣血脆弱病易動變證候百端若見其微證即便治之使不成衆病故謂之百病也治之若晚其病則成凡諸病至於困者汗出如珠著身不流者死也病如胸陷者其口脣乾目反張口中氣出冷足與頭相抵臥不舉手足四肢垂其臥正直如縛狀其掌中冷至十日必

死不可治也

頭身喜汗出候

小兒有血氣未實者膚腠則疎若厚衣溫臥腑臟生熱蒸發腠理津液泄越故令頭身喜汗也

盜汗候

盜汗者眠睡而汗自出也小兒陰陽之氣嫩弱腠理易開若將養過溫因睡臥陰陽氣交津液發泄而汗自出也

痰候

痰者水飲停積胸膈之間而結聚也小兒飲乳因冷熱不調停積胸膈之間結聚成痰痰多則令兒飲乳不下

吐涎沫變結而微壯熱也痰實壯熱不止則發驚癇

胸膈有寒候

三焦不調則寒氣獨留膈上不通則令兒乳哺不得消  
下噫氣酸臭胸膈否滿甚則氣息喘急

癥瘕癖結候

五臟不和三焦不調有寒冷之氣客之則令乳哺不消  
化結聚成癥癖也其狀按之不動有形段者癥也推之  
浮移者癖也其弦急牢強或在左或在右癖也皆由冷  
氣痰水食飲結聚所成故云癥瘕癖結也

否結候

否者塞也小兒胸膈熱實腹內有留飲致令榮衛否塞

腑臟之氣不宜通其痛腹內氣結脹滿或時壯熱是也  
宿食不消候

小兒宿食不消者脾胃冷故也小兒乳哺飲食取冷過度冷氣積於脾胃脾胃則冷胃爲水穀之海脾氣磨而消之胃氣和調則乳哺消化若傷於冷則宿食不消診其三部脈沈者乳不消也

傷飽候

小兒食不可過飽飽則傷脾脾傷不能磨消於食令小兒四肢沉重身體苦熱面黃腹大是也

食不知飽候

小兒有嗜食食已仍不知飽足又不生肌肉其但腹大

其大便數而多泄亦呼爲豁泄此腸胃不守故也

### 哺露候

小兒乳哺不調傷於脾胃脾胃衰弱不能飲食血氣減損不榮肌肉而柴辟羸露其腑臟之不宜則吸吸苦熱謂之哺露也

### 吐乳大腹可奚候

小兒丁奚病者由哺食過度而脾胃尙弱不能磨消故也哺食不消則水穀之精減損無以榮其氣血致肌肉消瘦其病腹大頸小黃瘦是也若久不瘥則變成穀癥傷飽一名哺露一名丁奚三種大體相似輕重立名也

### 洞泄下利候



春傷於風夏爲洞泄小兒有春時解脫衣服爲風冷所傷藏在肌肉至夏因飲食居處不調又被風冷入於腸胃先後重沓爲風邪所乘則下利也其冷氣盛利甚爲洞泄洞泄不止爲注下也凡注下不止者多變驚癇所以然者本挾風邪因利臟虛風邪乘之故也亦變眼痛生障下焦偏冷熱結上焦熏於肝故也

利後虛羸候

腸胃虛弱受風冷則下利利斷之後脾胃尙虛穀氣猶少不能榮血氣故虛羸也

赤白滯下候

小兒體本挾熱忽爲寒所折氣血不調大腸虛弱者則

冷熱俱乘之熱搏血滲腸閒其利則赤冷搏腸津液凝其利則白冷熱相交血滯相雜腸虛者泄故爲赤白滯下也

赤利候

小兒有挾客熱客熱入於經絡而血得熱則流散滲入大腸腸虛則泄故爲赤利也

熱利候

小兒本挾虛熱而爲風所乘風熱俱入於大腸而利是水穀利而色黃者爲熱利也

冷利候

小兒腸胃虛或解脫遇冷或飲食傷冷冷氣入於腸胃

病源候論卷四十一  
而利其色白是爲冷利也冷甚則利青也

冷熱利候

小兒先因飲食有冷氣在腸胃之間而復爲熱氣所傷而腸胃宿虛故受於熱冷熱相交而變下利乍黃乍白或水或穀是爲冷熱利也

卒利候

小兒卒利者由腸胃虛暴爲冷熱之氣所傷而爲卒利熱則色黃赤冷則色青白若冷熱相交則變爲赤白滯利也

久利候

春傷於風至夏爲洞泄小兒春時解脫爲風所傷藏在

肌肉至夏因爲水穀利經久連滯不瘥也凡水穀利久腸胃虛易爲冷熱得冷則變白膿得熱則變赤血若冷熱相加則赤白相雜利久則變腫滿亦變病醫亦令嘔噦皆由利久脾胃虛所爲也

重下利候

重下利者此是赤白滯下利而挾熱多者熱結肛門利不時下而久嘔氣謂之重下利也

利如膏血候

此是赤利腸虛極腸閒脂與血俱下故謂利如膏血也

蠱毒利候

歲時寒暑不調而有毒厲之氣小兒解脫爲其所傷邪

病源候論卷四十一  
與血氣相搏入於腸胃毒氣蘊積值大腸虛者則變利  
血其利狀血色蘊瘀如雞鴨肝片隨利下此是毒氣盛  
熱食於人臟狀如中蠱故謂之蠱毒利也

利兼渴候

此是水穀利津液枯竭腑臟虛燥則引飲若小便快者  
利斷渴則止若小便澀水不行於小腸滲入腸胃渴亦  
不止利亦不斷凡如此者皆身體浮腫脾氣弱不能剋  
水故也亦必眼痛生障小兒上焦本熱今又利下焦虛  
上焦熱氣轉盛熱氣熏肝故也

被魘候

小兒所以有魘病者婦人懷娠有惡神導其腹中胎妬

嫉而制伏他小兒令病也任娠婦人不必悉能致魅人時有此耳魅之爲疾喜微微下寒熱有去來毫毛髮鬢鬢不悅是其證也

驚啼候

小兒驚啼者是於眠睡裏忽然啼而驚覺也由風熱邪氣乘於心則心臟生熱精神不定故臥不安則驚而啼也

小兒夜啼候

藏冷而動

小兒夜啼者藏冷故也夜陰氣盛與冷相搏則冷動冷動與藏氣相并或煩或痛故令小兒夜啼也然亦有犯觸禁忌亦令兒夜啼則可法術斷之

病源候論 卷四十一  
軀啼候

小兒在胎時其母將養傷於風冷邪氣入胞傷兒臟腑  
故兒生之後邪猶在兒腹內邪動與正氣相搏則腹痛  
故兒軀張蹙氣而啼

胎寒候

小兒在胎時其母將養取冷過度冷氣入胞傷兒腸胃  
故兒生之後冷氣猶在腸胃之間其狀兒腸胃冷不能  
消乳哺或腹脹或時穀利令兒顏色素肥時啼者是胎  
寒故也

腹痛候

小兒腹痛多由冷熱不調冷熱之氣與臟腑相擊故痛

也其熱而痛者則面赤或壯熱四肢煩手足心熱是也  
冷而痛者面色或青或白甚者乃至面黑唇口爪皆青  
是也

心腹痛候

小兒心腹痛者腸胃宿挾冷又暴爲寒氣所加前後冷  
氣重沓動與藏氣相搏隨氣上下衝擊心腹之間故令  
心腹痛也



...

...

...

心頭...

...

...

...

...

...

...

周氏校刊

巢氏諸病源候總論卷四十八而証效醫之重舌

小兒雜病諸候四凡四十六論

解顛候

解顛者其狀小兒年大顛應合而不合頭縫開解是也  
由腎氣不成故也腎主骨髓而腦為髓海腎氣不成則  
髓腦不足不能結成故頭顛開解也

凶填候

小兒凶填由乳哺不時飢飽不節或熱或寒乘於脾胃  
致腑臟不調其氣上衝所為也其狀凶張如物填其上  
汗出毛髮黃而短者是也若寒氣上衝即牢柳熱氣上  
衝即柔軟又小兒脇下有積又氣滿而體熱熱氣乘於

藏藏氣上衝於腦凶亦致凶填又欬且啼而氣乘藏上  
衝亦病之啼甚久其氣未定因而乳之亦令凶填所以  
然者方啼之時陰陽氣逆上衝故也

小兒凶陷候

此謂凶陷下不平也由腸內有熱熱氣熏臟臟熱即渴  
引飲而小便洩利者即腑臟血氣虛弱不能上充髓腦  
故凶陷也

重舌候

小兒重舌者心脾熱故也心候於舌而主於血脾之絡  
脈又出舌下心火脾土二臟母子也有熱即血氣俱盛  
其狀附舌下近舌根生形如舌而短故謂之重舌

滯頤候

滯頤之病是小兒多涎唾流出漬於頤下此由脾冷液  
多故也脾之液爲涎脾氣冷不能收制其津液故令涎  
流出滯漬於頤也  
小兒血氣未定肌膚脆弱若將養乖宜寒溫失度滕理  
虛開卽爲風所中也凡中風皆從背諸臟俞入若心中  
風但得偃臥不得傾側汗出唇赤若汗流者可治急灸  
心俞若唇或青或白或黃或黑此是心壞爲水面目亭  
亭時悚動皆不復可治五六日而死若肝中風踞坐不  
得低頭若繞兩目連額上色微有青唇色青而面黃可

治急灸肝俞若大青黑面一黃一白者是肝已傷不可  
復治數日而死若脾中風踞而腹滿身通黃吐鹹汁出  
者可治急灸脾俞若手足青者不可復治也若腎中風  
踞而腰痛視脇左右未有黃色如餅糶大者可治急灸  
腎俞若齒黃赤鬢髮直面土色不可治也肺中風偃臥  
而胸滿短氣冒悶汗出視目下鼻上下兩邊下行至口  
色白可治急灸肺俞若黃爲肺已傷化爲血不可復治  
也其人當要掇空或自拈衣如此數日而死此五臟之  
中風也其年長成童者灸皆百壯若五六歲已下至於  
嬰兒灸者以意消息之凡嬰兒若中於風則的成癩癩

也

狀類

近舌根生形如舌而短故謂之望舌

中風四肢拘攣候

小兒肌肉脆弱易傷於風風冷中於膚滕入於經絡風冷搏於筋脈筋脈得冷卽急故使四肢拘攣也

中風不隨候

夫風邪中於肢節經於筋脈若風挾寒氣者卽拘急攣痛若挾於熱卽緩縱不隨

白虎候

按堪輿歷遊年圖有白虎神云太歲在卯卽白虎在寅準此推之知其神所在小兒有居處觸犯此神者便能爲病其狀身微熱有時啼喚有時身小冷屈指如數似風癩但手足不痺癱耳

卒失音不能語候

喉隴者氣之道路喉厭者音聲之門戶有暴寒氣客於  
喉厭喉厭得寒卽不能發聲故卒然失音也不能語者  
語聲不出非牙關噤也

中風口噤候

小兒中風口噤者是風入頷頰之筋故也手三陽之筋  
入結頷頰足陽明之筋上夾於口膚腠虛受風冷客於  
諸陽之筋筋得寒冷則攣急故機關不利而口噤也

中風口喎邪僻候

小兒中風口喎邪僻是風入於頷頰之筋故也足陽明  
之筋上夾於口手三陽之脈偏急而口喎邪僻也

中風瘳候

小兒風瘳之病狀如癩而背脊項頸強直是風傷太陽之經小兒解脫之臍瘡未合爲風所傷皆令發瘳

羸瘦候

夫羸瘦不生肌膚皆爲脾胃不和不能飲食故血氣衰弱不能榮於肌膚凡小兒在胎而遇寒冷或生而挾伏熱皆令兒不能飲食故羸瘦也挾熱者卽溫壯身熱肌肉微黃其挾冷者卽時時下利唇口青肥

虛羸候

此謂小兒經諸大病或驚癩或傷寒或溫壯而服藥或吐利發汗病瘳之後血氣尙虛脾胃猶弱不能傳化穀



氣以榮身體故氣力虛而羸也

嗽候

嗽者由風寒傷於肺也肺主氣候皮毛而俞在於背小兒解脫風寒傷皮毛故因從肺俞入傷肺肺感微寒卽嗽也故小兒生須常暖背夏月亦須單背襠若背冷得嗽月內不可治百日內嗽者十中一兩瘥耳

欬逆候

欬逆由乳哺無度因挾風冷傷於肺故也肺主氣爲五臟土蓋在胃間小兒啼氣未定因而飲乳乳與氣相逆氣相引乳射於肺故欬而氣逆謂之欬逆也冷乳冷哺傷於肺搏於肺氣亦令欬逆也

小兒病氣候

肺主氣肺氣有餘卽喘欬上氣若又爲風冷所加卽氣聚於肺令肺脹卽胃滿氣急也

腫滿候

小兒腫滿由將養不調腎脾三臟俱虛也腎主水其氣下通於陰脾主土候肌肉而剋水腎虛不能傳其水液脾虛不能剋制於水故水氣流溢於皮膚故令腫滿其挾水腫者卽皮薄如熟李之狀也若皮膚受風風搏而氣致腫者但虛腫如吹此風氣腫也

毒腫候

毒腫是風熱溫氣搏於皮膚使血氣澀不行蘊積成毒

病源候論 卷四十八  
其腫赤而熱是也

### 耳聾候

小兒患耳聾是風入頭腦所爲也手太陽之經入於耳內頭腦有風風邪隨氣入乘其脈與氣相搏風邪停積卽令耳聾

### 耳鳴候

手太陽之經脈入於耳內小兒頭腦有風者風入乘其脈與氣相擊故令耳鳴則邪氣與正氣相擊久卽邪氣停滯皆成聾也

### 中風掣痛候

小兒耳鳴及風掣痛其風染而皆起於頭腦有風其風

入經脈與氣相動而作故令掣痛其風染而漸至與正氣相擊輕者動作幾微故但鳴也其風暴至正氣又盛相擊則其動作疾急故掣痛也若不止則風不散津液壅聚熱氣加之則生黃汁甚者亦有薄膿也

### 聾耳候

耳宗脈之所聚腎氣之所通小兒腎臟盛而有熱者熱氣上衝於耳津液壅結卽生膿汁亦有因沐浴水入耳內而不傾瀝令盡水濕停積搏於血氣蘊結成熱亦令膿汁出皆謂之聾耳久不瘥卽變成聾也

### 目赤痛候

肝氣通於目臟內客熱與胸膈痰飲相搏熏漬於肝肝

熱氣衝發於目故令目赤痛也甚則生翳

### 眼障翳候

眼是腑臟之精華肝之外候而肝氣通於眼也小兒腑臟痰熱熏漬於肝衝發於眼初只熱痛熱氣蘊積變生障翳熱氣輕者止生白翳結聚小者如黍粟大者如麻豆隨其輕重輕者止生一翳重者乃至兩三翳也若不生翳而生白障者是疾重極徧覆黑睛滿眼悉白則失明也其障亦有輕重輕者黑睛邊微有白膜來侵黑睛漸染散漫若不急治熱勢卽重滿目併生白障也

### 赤目盲候

眼無障翳而不見物謂之盲此由小兒臟內有停飲而

無熱但有飲水積漬於肝也目是五臟之精華肝之外  
候也肝氣通於目爲停飲水漬臟氣不宣和精華不明  
審故不赤痛亦無障翳而不見物故名青盲也

### 雀目候

人有晝而睛明至暝便不見物謂之雀目言如鳥雀暝  
便無所見也

### 緣日生瘡候

風邪客於瞼眥之間與血氣相搏挾熱卽生瘡浸漬緣  
目赤而有汁時瘡時發世云小兒初生之時洗浴兒不  
淨使穢露津液浸漬眼瞼眥後遇風邪發卽目赤爛  
生瘡喜難瘥瘥後還發成疹世人謂之胎赤

鼻衄候

小兒經脈血氣有熱喜令鼻衄夫血之隨氣循行經脈通遊腑臟若冷熱調和行依其常度無有壅滯亦不流溢也血性得寒卽凝澀結聚得熱卽流散妄行小兒熱盛者熱乘於血血隨氣發溢於鼻者謂之鼻衄凡人血虛受熱卽血失其常度發溢妄行乃至發於七竅謂之大衄也

蠶鼻候

蠶鼻之狀鼻下兩邊赤發時微有瘡而痒是也亦名赤鼻亦名疳鼻然鼻是肺氣所通肺候皮毛其氣不和風邪客於皮毛次於血氣夫邪在血氣隨虛處而入停之

其停於鼻兩邊與血氣相搏成瘡者謂之鑿鼻也

鼽鼻候

肺主氣而通於鼻而氣爲陽諸陽之氣上榮頭面若氣虛受風冷風冷客於頭腦卽其氣不和令氣停滯搏於津液膿涕結聚卽鼻不聞香臭謂之鼽

鼻塞候

肺氣通於鼻而氣爲陽諸陽之氣上榮頭面其氣不和受風冷風冷邪氣入於腦停滯鼻閒卽氣不宣和結聚不通故鼻塞也

喉痺候

喉痺是風毒之氣客於咽喉之間與血氣相搏而結腫



塞飲粥不下乃成膿血若毒入心心即煩悶懊懣不可  
堪忍如此者死

### 馬痺候

馬痺與喉痺相似亦是風熱毒氣客於咽喉頷頰之間  
與血氣相搏結聚腫痛其狀從頷下腫連頰下應喉內  
腫痛塞水漿不下甚者膿潰毒若攻心則心煩懊悶致  
死

齒不生候  
齒是骨之所終而為髓之所養也小兒有稟氣不足者  
髓即不能充於齒骨故齒久不生

### 齒痛風齲候

手陽明足太陽之脈並入於齒風氣入其經脈與血氣相搏齒卽腫痛濃汁出謂之風齩

### 齒根血出候

手陽明足太陽之脈並入於齒小兒風氣入其經脈與血相搏血氣虛熱卽齒根血出也  
小兒數歲不能行候  
小兒生自變蒸至於能語隨日數血脈骨節備成其牘骨成卽能行骨是髓之所養若稟生血氣不足者卽髓不充強故其骨不卽成而數歲不能行也

### 鶴節候

小兒稟生血氣不足卽肌肉不充肢體柴瘦骨節皆露

如鶴之腳節也

### 頭髮黃候

足少陰為腎之經其血氣華於髮若血氣不足則不能潤悅於髮故髮黃也

### 頭髮不生候

足少陰為腎之經其華在髮小兒有稟性少陰之血氣不足即髮疎薄不生亦有因頭瘡而禿落不生者皆由傷損其血血氣損少不能榮於髮也

### 昏塞候

人有稟性陰陽不和而心神昏塞者亦有因病而精采闇鈍皆由陰陽之氣不足致神識不分明

落床損瘀候

血之在身隨氣而行常無停積若因墮落損傷卽血行失度隨傷損之處卽停積若流入腹內亦積聚不散皆成瘀血凡瘀血在內顏色萎黃氣息微喘濇濇小寒噏噏微熱或時損痛也

脣青候

小兒臟氣不和血虛爲冷所乘卽口脣青肥亦有臟氣熱脣生瘡而風冷之氣入瘡雖瘥之後血色不復故令脣青

無辜病候

小兒面黃髮直時壯熱飲食不生肌膚積經日月遂致

死者謂之無辜言天上有鳥名無辜晝伏夜遊洗浣小兒衣席露之經宿此鳥卽飛從上過而取此衣與小兒著并席與小兒臥便令兒著此病

此書主治而風命之尿人發難熱之發血會不舒姑命  
小兒驚風不眠血熱命他乘唱口昏青咽衣青瘋尿  
昏青刺之經其毒在髮小兒有寒性少陰之血刺  
食難與更利其難也亦有因頭瘡而死者本生者皆由  
此毒入於血內感於髮黃髮息髮斷髮落小兒髮  
入髮則髮之氣則乾若人即肉亦乾泉不消皆  
血之毒良藥而治常無乾髮若因壅蓄熱皖南建德  
醫家財難效氣不足者加識不分明

周氏校刊

巢氏諸病源候總論卷四十九

小兒雜病諸候 五 凡五十論

丹候

風熱毒氣客於腠理熱毒搏於血氣蒸發於外其皮上熱而赤如丹之塗故謂之丹也若久不瘥卽肌肉爛傷

五色丹候

五色丹發而改變無常或青黃白黑赤此由風毒之熱有盛有衰或冷或熱故發爲五色丹也

赤黑丹候

丹病本是毒熱折於血氣蘊蒸色赤而得有冷氣乘之冷熱互交更相積瘀令色赤黑

白丹候

丹初是熱毒挾風熱搏於血積蒸發赤也熱輕而挾風多者則其色微白也

丹火候

丹火之狀發赤如火之燒須臾燦漿起是也

天火丹候

丹發竟身體斑赤如火之燒故謂之天火丹也

伊火丹候

丹發於髀青黑色謂之伊火丹也

燦火丹候

丹發於臂背穀道者謂之燦火丹也

骨火丹候

丹發初在臂起正赤若黑謂之骨火丹也

厲火丹候

丹發初從髀下起皆赤能移走謂之厲火丹也

火丹候

火丹之狀往往如傷赤著身而日漸大者謂之火丹也

飛火丹候

丹著兩臂及背膝謂之飛火丹也

遊火丹候

丹發兩臂及背如火灸者謂之遊火丹也

殃火丹候



丹發兩脅及腋下髀上謂之殃火丹也

尿竈火丹候

丹發膝上從兩股起及臍間走入陰頭謂之尿竈火丹

也

風火丹候

丹初發肉黑忽腫起謂之風火丹也

暴火丹候

暴火丹之狀帶黑肥色謂之暴火丹也

留火丹候

留火丹之狀發一日一夜便成瘡如棗大正赤色謂之

留火丹也

朱田火丹候

丹先發背起徧身一日一夜而成瘡謂之朱田火丹也

鬱火丹候

丹發從背起謂之鬱火丹也

神火丹候

丹發兩髀不過一日便赤黑謂之神火丹也

天竈火丹候

丹發兩髀裏尻間正赤流陰頭赤腫血出謂之天竈火

丹也

鬼火丹候

丹發兩臂赤起如李子謂之鬼火丹也

石火丹候

丹發通身自突起如細粟大色青黑謂之石火丹也

野火丹候

丹發赤斑斑如梅子竟背腹謂之野火丹也

茱萸火丹候

丹發初從背起徧身如細纈謂之茱萸火丹也

家火丹候

丹初發著兩腋下兩膀上名之曰家火丹也

廢竈火丹候

丹發從足趺起正赤者謂之廢竈火丹也

螢火丹候

丹發如灼在脅下正赤初從髀起而長上痛是螢火丹也

### 赤丹候

此謂丹之純赤色者則是熱毒搏血氣所爲也

### 風瘙隱胗候

小兒因汗解脫衣裳風入腠理與血氣相搏結聚起相連成隱胗風氣止在腠理浮淺其勢微故不腫不痛但成隱胗瘙痒耳

### 卒腹皮青黑候

小兒因汗腠理則開而爲風冷所乘冷搏於血隨肌肉虛處停之則血氣沈澀不能榮其皮膚而風冷客於腹

皮故青黑

藍注候

小兒為風冷乘其血脈血得冷則結聚成核其皮肉色如藍乃經久不歇世謂之藍注

身有赤處候

小兒因汗為風邪毒氣所傷與血氣相搏熱氣蒸發於外其肉色赤面壯熱是也

赤遊腫候

小兒有肌肉虛者為風毒熱氣所乘熱毒搏於血氣則皮膚赤而腫起其風隨氣行遊不定故名赤遊腫也

大便不通候

未便於此候而尋上氣是證火也

小兒大便不通者腑臟有熱乘於大腸故也脾胃爲水穀之海水穀之精華化爲血氣其糟粕行於大腸若三焦五臟不調和熱氣歸於大腸熱實故大便燥澀不通也

### 大小便不利候

小兒大小便不利者腑臟冷熱不調大小腸有遊氣氣壅在大小腸不得宣散故大小便澀不流利也

### 大小便血候

心主血脈心臟有熱熱乘於血血性得熱流散妄行不依常度其流滲於大小腸者故大小便血也

尿血候

血性得寒則凝澀得熱則流散而心主於血小兒心臟  
有熱乘於血血滲於小腸故尿血也

痔候

痔有牡痔牝痔脈痔腸痔血痔酒痔皆因勞傷過度損  
動血氣所生小兒未有虛損而患痔止是大便有血出  
腸內有結熱故也

小便不通利候

小便不通利者腎與膀胱熱故也此二經爲表裏俱主  
水水行於小腸入胞爲小便熱氣在其臟腑水氣則澀  
故小便不通利也

大小便數候

脾與胃合胃爲水穀之海水穀之精化爲血氣以行經脈其糟粕水液行之於大小腸若三焦平和則三臟調適虛實冷熱不偏其脾胃氣弱大小腸偏虛下焦偏冷不能制於水穀者故令大小便數也

諸淋候

小兒諸淋者腎與膀胱熱也膀胱與腎爲表裏俱主水水入小腸下於胞行於陰爲小便也腎氣下通於陰陰水液之道路膀胱津液之府膀胱熱津液內溢而流於澤水道不通水不上不下停積於胞腎氣不通於陰腎熱其氣則澀故令水道不利小便淋瀝故謂爲淋其狀小便出少起數小腹急痛引臍是也又有石淋氣淋熱



淋血淋寒淋諸淋形證隨名具說於後章而以一方治之者故謂諸淋也

### 石淋候

石淋者淋而出石也腎主水水結則化爲石故腎容砂石腎爲熱所乘熱則成淋其狀小便莖中痛尿不能卒出時自痛引小腸膀胱裏急砂石從小便道出甚者水道塞痛令悶絕

### 氣淋候

氣淋者腎虛膀胱受肺之熱氣氣在膀胱膀胱則脹肺主氣氣爲熱所乘故流入膀胱膀胱與腎爲表裏膀胱熱則氣壅不散小腹氣滿水不宣利故小便澀成淋也

其狀膀胱小腹滿尿澀常有餘瀝是也亦曰氣癰診其少陰脈數者男子則氣淋也

### 熱淋候

熱淋者三焦有熱氣傳於腎與膀胱而熱氣流入於胞而成淋也

### 血淋候

血淋者是熱之甚盛者則尿血謂之血淋心主血血之行身通徧經絡循環腑臟其熱甚者血卽散失其常經溢滲入胞而成血淋矣

### 寒淋候

寒淋者其病狀先寒戰然後尿是也小兒取冷過度下

焦受之冷氣入胞與正氣交爭寒氣勝則戰寒正氣勝則戰寒解故得小便也

小便數候

小便數者膀胱與腎俱有客熱乘之故也腎與膀胱爲表裏俱主水腎氣下通於陰此二經旣受客熱則水行澀故小便不快而起數也

遺尿候

遺尿者此由膀胱有冷不能約於水故也足太陽爲膀胱之經足少陰爲腎之經此二經爲表裏腎主水腎氣下通於陰小便者水液之餘也膀胱爲津液之府旣冷氣衰弱不能約水故遺尿也

巢氏諸病源候總論卷五十一

小兒雜病諸候

凡五十一論

三蟲候

三蟲者長蟲赤蟲蟯蟲為三蟲也猶是九蟲之數也長蟲虵蟲也長一尺動則吐清水而心痛貫心即死赤蟲狀如生肉動則腸鳴蟯蟲至細微形如菜蟲也居腸間多則為痔劇則為癩因人瘡處以生諸癰疽癬癩疥齧蟲無所不為此既九蟲之內三者而今則別立名當以其三種偏發動成病故謂之三蟲也

虵蟲候

虵蟲者九蟲內之一蟲也長一尺亦有長五六寸者或

因腑臟虛弱而動或因食甘肥而動其動則腹中痛發  
作腫聚行來上下痛有休止亦攻心痛口喜吐涎及清  
水貫傷心者則死診其脈腹中痛其脈法當沈弱而弦  
今反脈洪而大則是虵蟲也

蟯蟲候

蟯蟲者九蟲內之一蟲也形甚細小如今之癘蟲狀亦  
因腑臟虛弱而致發甚者則成痔瘻癘疥也

寸白蟲候

寸白者九蟲內之一蟲也長一寸而色白形小扁因腑  
臟虛弱而能發動或云飲白酒一云以桑樹枝貫串牛  
肉炙并食生粟所作或云食生魚後卽食乳酪亦令生

之其發動則損人精氣腰腳疼痛弱又云此蟲生長一尺則令人死也

### 脫肛候

脫肛者肛門脫出也肛門大腸之候小兒患肛門脫出多因利久腸虛冷兼用軀氣故肛門脫出謂之脫肛也人之病癩候

癩者陰核氣結腫大也小兒患此者多因啼哭軀氣不止動於陰氣陰氣而擊結聚不散所成也

### 差癩候

差癩者陰核偏腫大亦由啼哭軀氣擊於下所致其偏腫者氣偏乘虛而行故偏結腫也

狐臭候

人有血氣不和腋下有如野狐之氣謂之狐臭而此氣能染易著於人小兒多是乳養之人先有此病染著小兒

四五歲不能語候

人之五臟有五聲心之聲爲言小兒四五歲不能言者由在胎之時其母卒有驚怖內動於兒臟邪氣乘其心令心氣不和至四五歲不能言語也

氣癭候

氣癭之狀頸下皮寬內結突起腿腿然亦漸長大氣結所成也小兒啼未止因以乳飲之令氣息喘逆不得消

散故結聚成癭也

胃脅滿痛候

看養小兒有失節度而爲寒冷所傷寒氣入腹內乘虛停積後因乳哺冷熱不調觸冒宿寒與氣相擊不散在於胃脅之間故令滿痛也

服湯藥中毒候

小兒有疹患服湯藥其腸胃脆嫩不勝藥氣便致煩毒也故謂之中毒

蠖蝮毒繞腰痛候

蠖蝮蟲長一寸許身有毛如毫毛長五六分腳長而甚細多處屋壁之間云其遊走遇人則尿人影隨所尿著



影處人身卽應之生瘡世病之者多著腰瘡初生之狀  
匝匝起初結痞癰小者如黍粟大者如麻豆染漸生長  
闊大繞腰生膿汁成瘡也

疥目候

人有附皮肉生與肉色無異如麥豆大謂之疣子卽疣  
目也亦有三數相聚生者割破裏狀如筋而強亦微有  
血而亦復生此多由風邪客於皮膚血氣變化所生故  
亦有藥治之瘡者亦有法術治之瘡者而多生於手足  
也

頭瘡候

腑臟有熱熱氣上腫於頭而復有風濕乘之濕熱相搏

折於血氣而變生瘡也

頭多蝨生瘡候

蝨者按九蟲論云蟻蟲多所變化亦變爲蝨而小兒頭櫛沐不時則蝨生滋長偏多嚙頭遂至生瘡瘡處蝨聚也謂之蝨窠然人體性自有偏多蝨者

白禿候

白禿之候頭上白點斑剝初似癬而上有白皮屑久則生痂癩成瘡遂至徧頭洗刮除其痂頭皮瘡孔如筋頭大裏有膿汁出不痛而有微痒時其裏有蟲甚細微難見九蟲論亦云是蟻蟲動作而成此瘡乃至自小及長大不瘡頭髮禿落故謂之白禿也

頭面身體諸瘡候

腑臟熱甚熱氣衝發皮膚而外有風濕折之與血氣相搏則生瘡甚壯初赤起痞癩後乃生膿汁隨瘡隨發或生身體或出頭面或身體頭面皆有也

惡瘡候

夫人身體生瘡皆是臟熱衝外外有風濕相搏所生而風濕之氣有挾熱毒者其瘡則痛痒腫焮久不瘥故名惡瘡也

燂瘡候

小兒爲風熱毒氣所傷客於皮膚生燂漿而潰成瘡名爲燂瘡也

癩癧候

小兒身生熱瘡必生癩癧其狀作結核在皮肉間三兩箇相連累也是風邪搏於血氣愀結所生也

惡核候

惡核者是風熱毒氣與血氣相搏結成核生頸邊又遇風寒所折遂不消不潰名爲惡核也

漆瘡候

人無問男女大小有稟性不耐漆者見漆及新漆器便着漆毒令頭面身體腫起隱疹色赤生瘡痒痛是也

癰瘡候

六腑不和寒氣客於皮膚寒搏於血則壅遏不通稽留

於經絡之間結腫而成癰其狀腫上皮薄而澤是也熱氣乘之熱勝於寒則肉血腐敗化為膿膿潰之後其瘡不瘥故曰癰瘡

腸癰候

腸癰之狀小腸微強而痛是也由寒熱氣搏於腸間血氣否結所生也

癰候

腫結長一寸至二寸名之為癰亦如癰熱痛久則膿潰捻膿血盡便瘥亦是風熱之氣客於皮膚血氣壅結所成凡癰癤捻膿血不盡而瘡口便合其惡汁在裏雖瘥終能更發變成漏也

五臟不調則生疽亦是寒氣客於皮膚折於血氣血氣  
否澀不通結聚所成大體與癰相似所可爲異其上如  
牛領之皮而硬是也癰則浮淺疽則深也至於變敗膿  
潰重於癰也傷骨爛筋遂至於死

### 疽瘡候

此疽瘡者非癰疽也是疔之類世謂之疔疽多發於指  
節腳脛間相對生作細痞癰子而而細孔瘡裏有蟲  
痒痛搔之有黃汁出隨瘡隨發也

### 瘦候

寒熱邪氣客於經絡使血氣否澀初生作細瘰癧或作

梅李核大或如箭乾或圓或長者至五六分不過一寸  
或一或兩三相連時發寒熱仍膿血不止謂之漏也是  
皆五臟六腑之氣不和致血氣不足而受寒熱邪氣然  
癩者有鼠癩螻蛄癩蚯蚓癩蟻螬等癩以其於當病名  
處說之也

癩候

癩者風濕搏於血氣所成多著手足節腕間而而然搔  
之痒痛浸淫生長世謂之癩以其瘡有細蟲如癩蟲故  
也  
疥瘡多生手足指間染漸生至於身體痒有膿汁按九

蟲論云螻蟲多所變化亦變作疥其瘡裏有細蟲甚難見小兒多因乳養之人病疥而染着小兒也

癬候

癬病由風邪與血氣相搏於皮膚之間不散變生隱軫軫上如粟粒大作匡郭或邪或圓浸淫長大痒痛搔之有汁名之爲癬小兒面上癬皮如甲錯起乾燥謂之乳癬言兒飲乳乳汁漬污兒面變生此仍以乳汁洗之便

赤疵候

小兒有血氣不和肌肉變生赤色染漸長大無定或如錢大或闊三數寸是也



瘡 瘡候

瘡由初生斷瘡洗浴不卽拭燥濕氣在瘡中因解脫  
遇風風濕相搏故瘡久不瘥也瘡不瘥風氣入傷  
經脈則變爲癩也

蟲胞候

小兒初生頭卽患瘡乃至徧身其瘡有蟲故因名蟲胞  
也

口瘡候

小兒口瘡由血氣盛兼將養過溫心有客熱熏上焦令  
口生瘡也

驚口候

小兒初生口裏白屑起乃至舌上生瘡如鷺口裏世謂之鷺口此由在胎時受穀氣盛心脾熱氣熏發於口故也

### 鷺口生瘡候

此由脾胃有客熱熱氣熏發於口兩吻生瘡其瘡白色如燕子之吻故名爲燕口瘡也

### 小兒口下黃肥瘡候

小兒有涎唾多者其汁流溢浸漬於頤生瘡黃汁出浸淫肥爛挾熱者瘡汁則多也

### 舌上瘡候

心候於舌若心臟有熱則舌上生瘡也

心氣舌腫候 心熱有熱則舌上生瘡也

心候舌脾之絡脈出舌下心脾俱熱氣發於口故舌腫

也 脾脈夾熱者發於口也

小兒喉候 通於舌其舌氣益受黃芩則主發黃其出受

小兒初生口裏忽結聚生於舌上如黍粟大令兒不能

取乳名之曰噤此由在胎時熱入兒臟心氣偏受熱故

也 由朝胃有客熱煎煉熏發於口兩側生瘡其色白也

### 凍爛瘡候

小兒冬月為寒氣傷於肌膚搏於血氣血氣壅滯因即

生瘡其瘡亦焮腫而難瘥乃至皮肉爛謂之為凍爛瘡

也 只瘡生口裏白氣味或至舌上生瘡或發口裏也

金瘡候

小兒爲金刃所傷謂之金瘡若傷於經脈則血出不止  
乃至悶頓若傷於諸臟俞募亦不可治自餘腹破腸出  
頭碎腦露並不難治其傷於肌膚淺則成瘡終不慮死  
而金瘡得風則變瘰

卒驚瘡候

此由金瘡未瘥忽爲外物所觸及大啼呼謂爲驚瘡也  
凡瘡驚則更血出也

月食瘡候

小兒耳鼻口間生瘡世謂之月食瘡隨月生死因以爲  
名也世云小兒見月初生以手指指之則令耳下生瘡

病源傳記 卷五  
故呼為月食瘡也

耳瘡候

瘡生於小兒兩耳時瘥時發亦有膿汁此是風濕搏於血氣所生世亦呼之為月食瘡也

浸淫瘡候

小兒五臟有熱熏發皮膚外為風濕所折濕熱相搏身體其瘡初出甚小後有膿汁浸淫漸大故謂之浸淫瘡也

王灼惡瘡候

王音旺

腑臟有熱熱熏皮膚外為濕氣所乘則變生瘡其熱偏盛者其瘡發勢亦盛初生如麻子須臾王大汁流潰爛

如湯火所灼故名王灼瘡

瘡濕瘡候

瘡濕之病多因久利脾胃虛弱腸胃之口動侵蝕五臟使人心煩惱悶其上蝕者則口鼻齒斷生瘡其下蝕者則肛門傷爛皆難治或因久利或因臟熱嗜眠或好食甘美之食並令蟲動致生此病也

陰腫成瘡候

陰腫下焦熱熱氣衝陰陰頭忽腫合不得小便乃至生瘡俗云尿灰火所爲也

悉引云鬼天九夜經也

時發亦有腹注此類風濕痺也

如腹可熱熨熨無渣食食與惡亂合不舟小則以空坐

會通效書

夏甘美之食宜命虛腫也主此病也

所折惡熱者身

香腹出甘酸皆濕命也因入脾夾因熱燥皆知也

或引小公頭微閉其土越皆眼日鼻齒滿也發其不也

張鼎云濕也因入脾實胃虛弱也胃之

會通效書

...

皖南建德

...

...

周氏校刊